

Aicorakineta nuka Gabriel mama ejai Daniel

Jeffersonville, Indiana, U.S.A.

61-0730M

1 Kisirereng Edeke ijo, onac. Yoga atupuruc, ipapero. Emwana noi, ajaut ne okanisa atupuruc na, konye erai nakaibuses noi ajaut ne. Eyalama noi ebe kipedo-kipedo alomun toma lolo kanuka aijanakin kana. Ido ebwaik eong ebe abuni ajaun kede aisisia kwana asabaton nu akaisakanykaarei nuka Daniel. Naedakit nace Aisiraret kere eringa eong egeara kede-kede Aipuceta Akanykaarei; Aiticaneta Akanykaarei; Arupepen Akanykaarei; ican iuni; aberu naka kotoma akolong; ariengiario naka ajokit nakarengan; ilukumin akwatat kede akaisaongon ka luongon luipucaritai; kere iswamaunos kotoma apak kana. Ido aomit eong ebe ekoto ber eong aige ayangaun na toma.

2 Kwana, emwana. Mam oni kilosikinit aiboi adaun aojau, kwape kipedoria. Ido na nges apak, duc, namam ibecokina, namam itunga idilatar kokanisa noinoi. Ido cut, aitelekarit, kesi kere ajaas kede acuman nuekusetek ekwam otogoikece kaceda, nejokar aiboi. Korai tikajaatar oni ngun, konye kwape kwana amamei ber oni ngin.

Luipu kotoma ikadwarakawok iboete akolong. Ajai ber eong aomit nuka ailipit aitimio kama ejaas itunga kanu amamus kede etogo loejai acuma naekusi ekwam loelilim, ebongonorete duc akaomisio Africa neapotu kwi koperiotor kotoma okwamin kangun, ido angor ngun kede ikecetim elurete kwap naka ireetinikec, apero kanen apaaran ka akuar mam anyoun kotoma aiboisit naperete kesi kotoma; komam enyamete, aimat, arai idiobore, aboi kanen kanu aikamun Akirot adiopet, arai aarei, naka Ejakait, kangolisawa.

3 Apedori eong aomoom nuikamunitos Mexico emwana noi, abeit, abu eong eboikin togo loajai acuma naekusi ekwam kasodi aitam aiwi akakuan, amwana noi. Kasodi asesen itunga ngul epote osawan iwongon tupuruc, kotoma aiboisit nati, ido komameete icolongo, kanu aiboikin. Itunga luedekas, adek nabeit, ojaas atwakare, odekas; engoti, abutunet; ka nuatoto nuedekas, idwe ludidik luejaas atwakare ka nginibore kere, aibwo cut kangina kotoma akolong naekulai komwana, omamei etolim kanenice kere, ido agonga bon kanejai idiopet kayenice ageun isawan iuni luka tupuruc kiton oui akuar ngin, kanu airar idakikan akaisauni kanejai ekejulan, ka aanyun aswamisio nuka Ejakait. Aiboi kanen aidarit, onapitos igomisin lutieik, olangir omojongitos, enapete kes kamu kede poro. Ngupengul bon ejaatar kesi.

4 Kosodi aomoom eong nuka ngul luiboite amagoron kangina, eipone loeyaununiata kesi itunga ngul luedekasi toma, lumam apedoritos karaida alosit, ido ko India, nekedokotor kesi idiopie kwap, do aidokokin idiopie kuju kangin, idiopie bobo kuju kangin, kwangin, kede atapon ka adekasia; neabuunanatar kesi ngul kotoma ka kinga naka irotin, kosodete aiperinikin kes toma, akolong ngin naekulai komwana. Kotoma okwamin, ka eimilianun naka ekipiei, ka iboro kwape kangun, aperete kesi cut kanen kotoma akolong kangin ka ekwam ka nginibore kere, komam ikunyarete arai angurian, bon...ido kotamitos aikamun Akirot naka Edeke, kanginisawa, icebore kanuka itaunokec. Aso inyobo do ebeitor oni alipit aitimio atupuruc na, kojai atunyturu okujuwok, okerete afans? Ekoto oni irumata ileic arai ingurian oni kanukangin.

5 Aso eitunit eong kokau pac, kotoma okido, ediopet kotoma okidoi luka angololin nuko ngalakimak, ejanakini eong kangina adiopekuar. Ido, oo, odakun ekwam. Oo, mam eong aanyunitor ekwam kangol, aimiliaununeta nuka ekipiei adiopet akaulo kanace, aliaikin akwap. Ido eipone loakusia ekwam kiton ikito apero kwap cut. Katema eong ebe, "Eebo ejaas kesi...aticepak ekotokin eong da alacar ekasuuti, naarai ebuni amameun idiotunganan kokwap kangina."

Apak edit onangun idiopemotoka okek, kosodi itunganan aikungokin ekek, okapakina alosit.

Kasodi eong alimokin esapat ebe, apedorit ngesi einer amusugun, eong ebe, "Idiotunganan ejai ngina?"

Ebala ebe, "Mam ijo ipedori karaida adolore adukena nuka aiboisit kangin," kalaaro naetukonokinos itunga.

Kasodi atemar, "Akepolou ibala ijo ebe ejaas-ejaas itunga ngina koipone kangol, eong ebe, ekwam lo kere?"

Ebalas ebe, "Ipudas airar nuikamunitos Edeke."

6 kasodi-kasodi eong alosit kwap ngina. ido ajaas amucalan, ipeser ludidik, itumunak, mam ikekemosi, mam ekenasi, mam enyakaite egaamu, ka einer nuikamunitos ipailonokec. Kanginikirot, apupokinete kesi, komam ikunyarete, eboiete kopupokinitos. Aiworoun itunga olutaari, aiworor bon itunga olutaari, ido ilukumin apotu konyoutu, koleleete akiyo akonyenekes koipone kangol, ikeetos ekecekanin kuju mama ejai Edeke, ipudas aitm kanuka ikecetauon, ipesur ka isap ludidik, ikar itomomon lukanykaarei, itomomon ka lukanykauni lukapolou. Kwana etiono ber ainakin ituunga luemojongitos karaida ber apupokin ijo, itei jo ngin-ngin itodunit ebe emame oni ibore yenebeitor angurian. Kisiyalamikini Edeke! Eebo ipa.

Ipuda ti oni da nginibore kere ojai adoketait naka atinen kwana kwape kejaar America kere, konye

mam oni kipedorit kwangin; aso inyikokini do ber oni kede lupekijaar.

7 Kwana, ejai ibore idiopet yenabu eong amisiik yenabuni eong akote aswam kotoma kane okanisa bobo. Imwasi bo ai luejaatar Ibaibulin? Ikeu akonikan. Ejok. Apukosi Isabulin 99 eroko oni kilipa. Atapit isio aiswamaenen nu, Onac Neville, ikar kau. Mam eong ajeni arai...Idaunitos yesi aisiom Esabuli atupuruc na? [Kotemari Onac Neville ebe, "Mam."-Ekewa.] Mam. Epuda eong, atukos, aisiom ecesabuli.

Atupuruc na, neajaar eong eboie kotoma agolaka naka aisia, aoomoi Aisiraret ka Akirot, abu eong aoomoo, "Ijeni ijo, ebuni araaut ibore yenejok noi ainakin-ainakin kes kere aisiom Esabuli. Amina eong ngin ejok noi."

Ibore yenainakini eong aiyap mot, aponi enomakin eong esimu Kane elwana, ko Cheyenne, aso ngin nges apolou eyapitor eong.

Ido kwana, kwape kipukoria oni ko Sabulin, kijaar eong kede alimonoreta nuibeit alimor, nueinakinetai eong ainakin. Isabulin 99.

8 Kagear apak ngin, alimonoreta kere nuikamunitos airiamunun kane okanisa, ka kotoma alimonokin nako kinga, apote abunore ko Yapiesi ko Jeffersonville. Idiotunganan yenipuda ajenun nuikamunitos airiamununeta ekoto iwadik, arai iwadik ekekior ka aiboisitike, kosodi aibwaikin olutaari kotoma angeset naka aijanakin atibong na. Ebunio aijukakin ijo akiro toma apak kanu ijo akapanakin kanu ajaun toma airiamun."

Erai do nen, arai ekoto idiotunganan koingaren ajenun nebeit oni aibwaikin airiamun, kijaar oni kede eswamae lo esipokinitai, koyapiesi kangina kapekwana, lo bon idokokini ijo akonikan kede neilomunitor ijo. Ido ibuni aijukakin ijo akaadi eringa apak, tetere ijo ijenuni nejaikin airiamun, kede aticepak nuebeit aimor, kede ace da nuejaas, arai kipedori adumun arereng. Itei ijo, arai aiboisit naejenete itunga naelomuniatar ngun, elimuni idiopet nu, olimuni idiopet kwa, mam-mam do jo imisiikini, itei ijo. Aso oinak...Iwadik ekonikior ka neilomunitor jo, kosodi aibwaikin ne, ido elemuni Billy Paul kosodi akorar.

9 kwana, aponi kingisitete, da, ajaunos bobo... "Onac Branham, ijaun bobo jo aijanaakin ace na aitangal kane kokanisa, kede amiisikin aomisio?" Mam. Mam. Amisiikin aomisio ebuni eraun-araun inacanwok ice. Kijaar oni kede Onac Neville ne kwana loejaas kede ainakineta na aidwar, loedwaranakini luadekak ido itijeninikini kes iboro luipudas kesi ajenun. Ido kijaar oni onac loenyaritai Higg-... Higginbotham, ediope...arai lomunot, ijaanakit ejok atukot. Mam eong etei nges atupuruc na, konye ajaas duc kede ainakineta naka einer kangajepa. Ka amucalat naenyaritai Arganbright, Inac naminat naejaatar ainakineta naejul angajepa.

10 Ido aisiiranareta nu ejaas aitodiar ebe eraas nuka Edeke, narai mam elomunitos kotoma aitolutoluna, ejaas cut toma ainapeta. Ido negeuniata ainakineta nu atukun, ilosi aitam-aitam asipo...asipokin kes bobo Okanisa, koipone loebeitor. Ido ebeit eong aanyun kes apak namam elwana, ido tetere-tetere-ariamununeta inyikokinete kaitekoora koipone loka Ejakait. Kwape kidumunia kotoma aitekorita.

Konye itunga lu luminan, kwa ebalar aidunyeteka, Aberuke Wood, naesipokinit amaikurofon kuju ne, kede ateepe kaulailo, kanu aikam airiamun, kanu apeleikinet na adumun aisiiranareta ngun, ka aiwadik kes, kede aanyun arai edolitos arai mam, kiany? Eipone ngol nges eanyanara ngesi kes. Ajeni eong aberuke Wood, kwape aberu namunot. Ido elimonokini eong nuiboro luipu lualimununi, kojaas aitodolikin.

11 Kwana, kiyalama oni kanukangun. Ikonibo aisiengunet na ai kanukang ore kane! Neabunio eong ore, kosodi...Amisiikini na aomisio kanejai ewai loadwar itidisiari eong agogong cut, ido, kanukangun, ejukaki Edeke eong ayengun adio kanukangun, kanejai aidwar, ka einer kangajepa. Ejaas itunga iarei lugelegela luedwarete. Ediopet einer, loce amisiikin nuejai ediopet einer kotoma angajepa numam ejenas, erai cut adwanut obe. Ido kwana ebuni araun...Kijaar oni kede ngun nginipaaran, kanginiriamun kane neijaikinor oni kede ailipanakinowok naka itunga kotoma airiamun.

12 Kwana, ejai itunganan yenepedori aingit, abu...kanu ikamunitos ainakineta. Eebo, aroko eong ajaatatar. Eipone bon loetwasama eong, erai kotoma aigitar itunganan ilope bon, najaatar eong. Ido kanu adumun kes, acamunit eong ebe iwadikatos kesi abao na iyemuto kau ngina, adumun acamakinio kede asipoki esawakon ejok, kanejai Billy Paul, ekasapat, kanuka kane araibo kotoma airiamununeta akaulo kanu. Kokinga kangina kairiamununeta, kanenice kere, ekoto kojaatar jo ikaadi yen ijaikini Billy Paul ijo, arai ejai iceboro kotoma aijar yen mam jo imisiikinit, komam ijeni eipone lonyounet kotoma, ido ojai amoot acoa naka Ejakait, aso ko...koany Billy Paul, okooka, loerai igirigiran, ido einakini ngesi jo ikaadi, esipokini ngesi jo apak, adiope.

Ido nekijaunor kede einerakin naka aiyeyea, nen do nges kilomaria toma nepepe, ijo kede eong bon. Ido arai erai angor eponitos, ilosi jo keong kede akaberu. Kosodi do jo...ibuni do oni ajenun, ido imoi Ejakait kasodete aingitun Nges nuebeit ijo aswam.

13 kwana, nuce, atiokusio nudidik kaceda nuikote nen, einakinio nejai Onac Neville, kede Onac

Higginbotham, kede Inac Arganbright, kede iceda luinerenenas ka angajepa kijulete, luejaasi okanisa ne.

Kanukangun, irai oni kwape lujai orot. Eyuunit eong ebe arai Yetero, kobu olimok Musa kadiopeparan ebe, koany, "Alemutu imakio ice." "Ido aponi kolemunai Emoyo loka Edeke kama Ka Musa kosodete aibwaikin omakio akaisakanyikaarei, kosodete aidwar. Konye iboro luepolok ka luatioko apote neajai Musa bon." Kwana, mam oni irai Musa, karaida lu araut imakio kwi, konye iringa ijaanakini Iyawe Edeke, kede Ipir loka Akim ngopengol ingarenikini oni kiton akwap naka aisumunet.

Aso, do, eebo, ejaunos ace, airiamununeta, kede ejaunos aijul...Amisiikini aomisio da epote. Einakini do ngin eong arereng ailip kede aisia, neajenunia eong ebe adolutu aparasia nu einer kede itunga kotama aiyeyea, kasodi akapakin kanukec.

Kwana kiitu, Billy Paul Branham, egirigiran loka awokoriamunun, ebuni...ejai toma...iwadikatos lumunon abao kaungina. Ejaatar eong aiwadikaet ne naelimorit ngun, ka alimokin itunga tetere esiomete kotoma abao naiyemuto, elomarete kinga.

14 Kwana, kwana, atupuruc na kijaatar oni aisia naepol, ido atibong na ibuni ainyikokin kotomake. Ido, arai ekoto Ejakait, asabiiti naebuni, ace bobo, kotoma kangupekangun. Mam eong ajeni aipone lo ajaar aidulokin kiton ne alomaria eong aisia ido eroko erai nuka aiyeyea mamaka, ber, ido kwangin aroko eong agongakina mama ejai Ejakait.

15 Kwana, yesi lujaatatar ikusibaibulin, apukosi Isabulin 99, 99. Ido abuni eong aisiom ekokoro lo 1, esiom atukos ekokoro lo 2, kasodete do oni aisiom ekokoro lokawasia nepepe. Kinyikokini oni ngaren; eong, lo 1; atukos, lo 2; eong, lo 3; atukos lo 4; kiton okokoro lokawasia, kasodete do ibuni oni kere aisiom nepepe.

Kabwoata kwape kisiomio Akivot naka Edeke. [Kosiomete Onac Branham kede atukos Isabulin 99:1-9 kwape kalimunitor ngesi-Ekewa.]

Eyait Ejakait komaranete itunga; iboie kama ikerubin; kijangijanga akwap.

Epol Ejakait kotoma Sion; Ejai kaju noi aitelekarit itunga kere.

Kituroto kesi ekonikror loepol angosibib; Lokalaunan Ngesi!

Emina agogong naka ekabaka da etube; Iticasi ijo abeit; Itubi kabeit kadolit kotoma Yakob.

Kitopoloosi yesi Ejakait Ewokodeke, ido komaata koicolongoke: Lokalaunan Ngesi!

Musa ka Aaron kotoma Osasedotinique, ka Samuel da kotomakec kaluiworoete ekekiror; Apotu kiworoto Ekjakait kobongok Ngesi kes.

Kiner kakes kopir loka edou: Apotu koricata aitejenunetake, ka ekisil loabu koinak kes.

Wu Ejakait Ekosideke, ibu kobongok kes; ijo Edeke loibu kisioni kes, karaida kinyangenenei nuka aswamisiok.

Kitopoolosi yesi Ejakait Ewokodeke, komaata da koukotoke lokalaunan; Naarai Ejakait Ewokodeke erai Lokalaunan.

16 Ketuluroto awokokwes.

Abeit, Ejakait, kiwadikatai Akiro nu ido kigirakin Ekonebulesit, Daudi, kotoma Osabuli Mamakon. Kiboie Ijo kakidingos naka Ikerubin. Irai ijo Lokalaunan, ido Ekoniukot da erai lokalaunan. Ekunyutu isio die kobwasitete ikositauon kede Aokot nuka Ejakait Yesu, ka aomisio nuipiororoete, kede aiyuun ka aitigogonget ebe ibunit isio akonyen nuka Ekosideke. Kiyapaar atukos na kere atupuruc na. Opuko akosiki nuka amisiikin. Iner kitorunite mamakosi, kotoma acoa tetere isio kijenuni eipone loebeitor ajar kotoma apakio kanu ka Akonyenekon.

17 Ti isio kilip Ijo, Ekosideke, apukokin isio iboro lu luka aiyeyea luaponi kibwaitete ikar lu kere, kwape kijaar adolokin adiopet kotoma Akiro nukabeit, kogogong noi. Abu Ijo kinerite ngun nekijaar Ijo ne toma akwap, kasodi atemar, "Ngin yenesiom, kohen." Aso, ibuni isio ka asianut naepol noi Mamakon, Ejakait, kasodete aimo Akonicoa, komam kijeni nuebeit alimun. Kinapinapit kane ikokoron idis, ido kaiyapaara ka agongakina kere Mamakon kanuka abongokinet, naarai emamei acelosikinet konye bon ebe kipedori isio ajenun esawa lokijaria isio, tetere isio ikapakin kanu iboro luapolok lueponitos koingaren. Mam kereka Ijo kiinakini isio ngin, Ejakait, Koiror kangol Loabu kisisianak isio kere ebe ekoto isio ailip kwanata! [Kilipi Onac Branham kede Atukos nepepe kwape kejaar kotoma Matayo 6:9-13.-Ekewa.]

...Papakosi loejai toma akuj, Ekonikror kitalaunai.

Akonijakanut kobu. Nuikoto Ijo kiswamai kakwapin kwape kiswamaere kotoma akuj.

Koinakinai isio lolo ikosinyamat luka lolo.

Kisionioi sio akosipesenin, kwape kisionio isio lukapeseninikosi.

Sirikiyanga isio toma acodunio, konye koyuunai kama ejai lokaronon. Naarai ajakanut, ka apedor, ka apolou, eraas nukon, ikar kere, Amen.

Kiboikinos.

18 Kwana, arai ekoto ediokiliokit alacar ekekooti, olacakin. Kosodi ngul luebwoete airimun ko-kosiep loarwatat, arai epipilar akonikeju, kanukinyo, olacakin alomar kinga.

Ido kwana, aomit eong, arai ekotosi idwe alosit agolaikikec, araibo adaun aitwar kes? [Kotemar Onac Neville ebe, "Mam, mam epedorete. Mam oni kipedori ajaun kede ngin atupuruc na, kanuka atukos naepol."-Ekewa.] Kotemari ecokon ebe agolaik kere ilelebasi itunga, aso mam oni kipedori ajaun kede aisisia naka kanasabiiti kanuka idwe ludidik. Ido ti oni kiyalamikin noi ikesa ludidik lu kwana aiswamanar kede oni, kwape kijaar oni atupuruc na, agear Aisiraret naepol, naelal najeni eong ejok cut ebe ebuni araut naepol ajokis nejai papakon ka totokon, ka luminanakus luejaas ne, ka nekus da ludidik. Aso, kidolokin oni ngin kede aiyapaara noi.

19 Arai kitojok Ejskait, atupuruc na kilemunit oni akou naka akirot na Asabaton akaisakanykaarei. Ido atupuruc na kinera oni nuka Daniel kotoma aijoreoro, kosodi Gabriel eporuni aicorakin nges muikamunitos ngaren. Neajaar Daniel toma ailip, abu Gabriel, Emalaika, kobu aicorakin nges.

Atibong na, akoto eong einer nuikamunitos alosikineta akanykape nuka Apejoke, akiro akanykape nuegelegela ebeit aitolomunio lolo, nuabunio Gabriel.

Osabiiti ngol, kitojok Ejakait, akoto eong apesikin alosikineta ka apak naka Aturio Akanykaarei nuka Ekanisa, ka apak naejaas kesi, ka nekibwoia oni lolo. Erai nen atupuruc kana asabiiti kangin, itojok Ejakait.

20 Kwana, apolou naka kana. Ayangaunit eong aiwadikaetaka nuka Aisiranareta adis nuka okau. Ido atupuruc na akoto eong arucokin, naarai ejaas nu toma ateepe naebunio aijukar akwap kere, akwapin nuipu. Ido, duc, alosikinet naruconokina eong kede nuka okau, erai kanu naarai aticepak ejai itunganan airar ateepe kirwana nasodit, ido mam emina amisiikin nuapeleikinit eong nealimuna eong icebore.

Ijaun oni kwana bala ilapio toma aisisia Eitabo loka Apikokinio, Apukokinio naka Yesu Kristo. Kitor oni toma aturio nuka ekanisa. Isulai iunu lusodit luka Apukokinio araas aturio nuka ekanisa. Kosodete adakar Yokana kuju kotoma osula lo 4 ka lo 5, kosodete aitodikin iboro lu-luabeit ajaun ekaulo. Kwana, kosula lo 6, kijesun ngesi kwap bobo, kanu aanyun iboro kiswamas lugeunete kotoma osula lo 6, ekokoro lo 1, kiton esula lo 19 ka ekokoro lo 21. Kotoma kanen kolomunete Aipuceta, aitianeta, ican, emaase a-aberu nejai toma akolong ka acakario naka apiu naka arengan ka ilukumun akwatat akaisaongon ka luongon ka iboro lu kere.

21 Araun lo esabiiti loka aisisia naepol. Bian, apaaran kere, mam apatana eong anyoun kotoma agola, atamit aisisia. Ido erai icebore kotoma apak nakawasia, luipu kotoma koyuunak lumojong kane, luabu eong esisianak, abu eong katema ebe, "Toma ngina ne ejaas asabaton akaisakanykaarei nuka Daniel," konye mam eong abu atam alomakin ngin, aitetemun ngin. Konye apak na kanuka asianut naka Edeke, ainak eong akaijar aitam aingitun asianut naka Edeke, tetere eong ayangauni ngin mama ejaas itunga. Ido kotoma kane ajai eong adumunun iboro lumam eong ajeni idiobore kanukec.

22 Kosodi, do, ajai- ajai eong asiomi eitaboke Dr. Larkin, eitaboke Dr. Smith, aiwadikaetake Dr. Scofield, aomisio nuegelegela kama ejaas itunga aiboisio kere, konye mam eong abu apedo anapinapikin nukec nepepe kanu aitolomun ngin korai naedolit. Kiany? Aso, esabiiti lo etemonokit eong aipejokin aboisit naidarere itaabon ko Kentucky, kotoma akiro nukolosek nuesisiare amar apaarasia ka apakio, ido alemun kotoma aboisit naidarere itaabon, kaceda, itaabon lukolosek kere luapedori eong, ka imodiobore yenididi kere yenapedori eong aswam, ido ojai akamun kere kotoma Yesu Kristo apukokin ngin mamaka.

Naarai, mam eong akoto alimun, "Ajani eong na, kosodi ajani eong ya." Ejeni Ngesi ekatau. Epupokint Ngesi eong. Konye akoto eong ngin, ebe apedori eong aitacaikin Iketunga, kanukangun eyuunit eong ebe einakini Ngesi eong ngin. Mam ber eong ajani kwape kwana, konye amunokina eong Nges kanuka asabiiti kana etupakini, naarai eraun ngin atutubet naepoloajokis noi ajenun, asabiiti ngin, ka asipokin asabaton ngun akaisakanykaarei.

23 Kanginidiopet ejaas kede aiboisit naitegelikina. Ido nekiswama ijo, ilosi ijo ajulujul kes angetar, mam elomunete ejok, mam etakanunete ejok. Ido, kanukangun, eong-mam eong aticepak epedori ajaut kede ngin ejok, konye alosi eong amunokin Ejakait kanukangin.

Ido eitunit eong Solomon apak adiopet ilipi ido kilipite Ejakait Edeke ainakin nges acoa, mere aknukeng, "mere aiyatakinio naka apaarasia, mere aijar naewoja, mere abar," konye ebe kojaunos ngesi kede acoa aijen eipone lo-lo-lo atubonokin itunga. Ido abu Edeke orima ailip ngin, kosodi ainakiin Solomon acoa ngin, naarai arai kanuka Iketunga. Ido ngun nges elipitor eong Edeke ainakin eong ajenun apolou naka asabaton nu akaisakanykaarei, naara ajeni eong cut ebe erai apak naibecokina kanuka atur nakijari oni kotoma. Ido kanukangun, akoto eong ajenun; mere kanukang, arai eong...mere kanukang. Naarai akoto eong ajenun ngin. Mam eong abala kwangin, "Mere kanukang," naarai mam eong epuda ngin kanukang. Akoto eong ajenun, naarai akaoto eong ajenun nekijaria oni ka apak anyoin kijari oni kotoma. Kasodi, do, ajeni eong ebe kaponi ngin kijaikinai.

24 Ido luegelegela apotu komisiikisi ngin ido kajaas kangin kokau. Ekesa ediopet, ajai eong aisiom, abu kongetak kere ko 1919, nuka asabaton akaisakanykaarei. Eebo, mam ekote nen.

Aso, akaulo naka asabaton akaisakanykaarei, akaulo naka asabaton akaisakanykaarei, ongetakinis kere. Aso mam-mam oni...ikoto oni ajenun abeit. Ido elipit eong Edeke ainakin eong abeit.

25 Kwana, kanu aitogogong nu, abongosi kau, akoto eong aisituun ber bobo motimot nuka okau. Aso kanukangun, acekiro nuwadikat eong, nukijaar oni kotoma kalo 5, esula lo 4 ka lo 5, tetere itunga emisiikinete. Nasodit ber, eroko oni iswama nu, akoto eong arucokin, tetere ijo idumuni kotoma kalo 4...

Kwana, iitu, esula 3 arai Ekanisa loka Atur nako Laudekia, kosodete Ekanisa aurupoor kotoma angeset naka Laudekia.

26 Kwana, atamit eong aitetemikin akaberu nuikamunitos ngin. Ajaas eong kede Becky, akokuka, kede kere idikisionaris luagelegela ka iboro kere luipedori isio adumun. Mam einakinetos abongokinet. Alemuni eong edikisionari lo Ebaubuli. Alemuni eong edikisionari lomojong loka Ayonanin. Eong-alemuni eong-ikewadikak kaceda luipu, edikisionaris lukatinen kwana. Amamei karaida ediopet kakesi loapedor...ainakin akiro arai abongokinet, ejaas aceda.

Abu akaberu kotema, "Eipone ali kiomitor ijo itungawok, lueraas itunga lukican, ido luipu kakesi mam esiomitos kwape kajaar oni, amisiikin kwangun?"

Katema eong ebe, "Einakini Edeke abongokinet."

Mam ace arai etiono amisiikin ngin biai, Epedori Edeke abilibil ngin kosodi ainakin apatanar. Naarai irai oni e...atutubet naka itunga kangul lumielas, ilipete kanu apaaran kangin ka esawa ngol. Ido esipokina awokokonye toma Akuj, ido kingicakinit Akebongun. Ido ajeni eong ejok cut ebe kitodikini Ngesi oni. Kwana mam ebuni alimokin oni apaaran arai esawa, mam emamei etunganan loebuni ajenun ngun, konye ejena ebuni alimokin oni apaaran naka asabato nakijaria oni, arai bon kipedori oni adumun ngin.

27 Kwana, kosula lo 4, aponi Yokana kodakarai kuju katipet, akaulo naka Ekanisa. Yokana, alosit kuju, abu koany atur naka Ekanisa nangetakina. Nen nges akotor eong abwouna, ber mot, atemar, ebe: itunga luumunosi icebore yenepol, kouwokina, yenapedor naepol aismamaun, kotoma atur naka Imo, ibucaritos kaitebeikin. Atur naka Ekanisa, ka kere nuepote aismamaun kotoma apak naka apugan naka Imo, iwadikatai kamaka Apukokinio 1 kiton Apukokinio 3, kaimoriarit. Kosodete do Ekanisa aurupoor ka ayangar kuju, ido luce lu, kiton osula lo 19, eraas nges nuiswamaikinos ateker naka Iyudayan, akaulo na Ekanisa alosit kuju. Ido erai apak naka aitanio naepol, emamei iboro ebeit kismama kotoma Omo; atubutubio bon, kaceda, kwape kibunio oni adolokin ngun kasodete aanyun.

Konye Ekanisa, elopet, adau anyoun kotoma 13...kotoma okokoro lokawasia lo esula lo 3 loka Apukokinio, apak na angetakinor Atur naka Ekanisa loka Laudekia, naarai nakawasia.

28 Apotu oni alemutu nginitur naka ekanisa, nginisawa, nginibore yenabu iswamaun, nginicerit, nginiyaka, eiponekec, nuapotu kesi kismamata, kasodete ayangaun cut kwap kiton akiro nukolosek kiton cut nejai nakawasia, kinomakinitai cut ngina kotoma aput, kosiep naka arwatat. Ido nepekidaunia, abu Emoyo Lokalaunan kolom toma kosodi ainomakin alunguret naka eipone kangopekangol karwatat, kasodi apukor ngin Ngesi Elopel kanepa kane mama kijai oni kere.

Kwana, kotoma aswam na, emuno eong, angeset kana ebuni Ngesi kede icebore yenepol kosodi aitodikin oni bobo ebe kijai oni apak nakawasia.

29 Imwasi bo kayesi kiiratiros loka Kennedy...Einer loka Ekapolon kakwap Kennedy, aomisio kaceda? Imwasi ai kiiraritos amurwounet na, ebe olap losodit adiopet, emurwounitai ebe ebuni America ka Russia kere epuriosi? Kere nuipuda oni kes ngun kere. Eyapie noi edepar eipone lokiomitor oni. Kiany? Aso, arai keyapie noi kiton itunga da luka akwap kana amurwo ibore yenapolon yen aismamaun, ekoto do oni akapitos, iboro kere eraas luka lolo, alimonor kere, nginibore kere ekapakina, naarai mam oni kijeni esawa enyoin ebunio Ewokokajait anyarar oni. Ido kenya Ngesi, "Kopotu ne," ekoto ijo okapakina. Ido ebuni abunore toma osawa lomam ijo kiomitor.

30 Ejai kwana aisikwarunio napolon nako Pentekosit asilior. Kiseseni oni ngin kaiboisio kere, aikunyakineta napolon nakawasia. Adaun alimor aisiraret. Nginibore kere ekapakina kwana, kidareunit. Adaun Ekanisa aipucar. Iyatakinitos luaronok aswam nueroko. Kiyatakinitos ikanisan aisinyikokin. Ejaas lukalaunak aikunyun die mama ejai Edeke. Ejaas ainakineta nuka Emoyo Lokalaunan aiyatanakin katukosia nudidik. Ijai oni apak nakawasia. Oo, amina eong ekosio ngol loatapit isio awoenen kokanisa.

Edarit eong abunore naka apaaran kangin naka aiyalama naka ikar elukumit,
 Nakebunio Ewokojakait Loisirerengitai kosodi alemar Aketeran naidarit awai;
 Oo, emunyi ekatau, imiela apaaran ngin naejijim,
 Naebonguna Eketajaraniwok akwap bobo.

31 Kidarit esawa ngol! Kwana, kotoma osula lo 5 ka ikokoron 5, idumuni oni ebe, kotoma aisisiawok pac, nekinerar nuikamunitos ekalakunan lopajan, loapotu adumutu ebe arai Kristo. Ketupusoto ngin kede Rusi: Rusi esekari ewai; Rusi ijaanakini; Rusi iyengi. Asekar ewai, nges arai aitojokio, aijaanakin, aisikapikin, aitalaunio; aiyeng, arai Emoyo Lokalaunan, kiton neadoluna Epucit loka Edukone. Ibus biai!

Abu Ekanisa kobu aitorun nejai John Wesley, aitojokio, arai...Martin Luther, aitojokio; kiton nejai John Wesley, aitalaunio; kiton Pentekosit, aibatisao naka Emoyo Lokalaunan; ido kwana, iyengi, idarite Abunore naka Ejakaitike. Kaitekoora!

Ekalakunaniwok Lopajan, adolitos imakio nekenyarata Nges ebe Imerekek, eyapikinit araun Engatuny, kwape ekatubon, ijani ijo, kede eitaabo loipucitai kirwan akanyaare. Nakeyangarere eitaabo, abu aswam naka apuronokin kongetakin.

32 Kwana, kotoma osula lo 3, adaunit Ekanisa alosit kuju, konye kwana ebeit alakunio apukorio, eipone lo alaku-alakunere Ekanisa, apukokinio naka kanu apotu kiswamaunos kotoma apak naka aturio. Itei jo, adau Ekanisa alosit, aso ejai do Kwana Ngesi aitoduun kotoma osula lo 5, eipone loabu Ngesi kiswama ngin, nuapotu kiswamaunos, eipone loabu Ngesi kipucara Ekanisa cut. Apukokinio naka Ekekiror; aibatisao naka akipi, kitwasamaete Ekekiror; Aijar namam edaun; emamei egeena loka ikar kere; aur naka emun; Ayuar naka ikar kere; aisisianakineta kere nukapolok, ajenunio sek naka Ekanisa naponi kopukokinai mama ejai Ekanisa. Ejai Ngesi aitoduun eipone loabu Ngesi kiswama ngin.

33 Kwana, ejaikini epajanawok eitaabo loipucitai kirwan akanyaare loka alakunio kama ejai elopet Obe. Amen! Loarai, idumuni oni, arai elopet Obe? Edeke Elop. "Kosodi Imerekek abunore kolema eitaabo kakan nakoteten naka Ngol lokeboie Koicolong." Ingaibo arai Imerekek? Ekalakunan, ekalakunaniwok lopajan, epajan mama ejai Ekanisa, loabu kobu alakun Isirael.

Kwana ilosi oni Alomar toma kangun atupuruc na. aponi olakunai Isirael, konye mam kiswama kanukec, naarai apotu kesi ongeroto Nges. Konye, abu Ekanisa kijau akecelakunio, ido erai ngesi Ewokolakunan lopajan. Kwape abu Boaz olakuna Naume tetere edumuni Rusi, Amoabit, natiakaritai, amoit, kwape kwangin abu Kristo kolakunia Isirael, abu kijaik akecelakunio ido aponi kongeroi.

34 Kiitunitos yesi aitim, ebe aponi etunganan inomai, lo enerenena eong acepakio? Kotoma apakio nuka ejie, neabu...Arai ngesi etunganan lo ajok. Amamei ibore yenajeni ngesi, ido aponi kodumunai nges ikamunit emusaago. Karaida, ikamunit nges emusaago koipone lo, ebe abu oker kotoma apak naka ejie. Kosodete nges adumun ikamunit emusaago ido abeit nges anomario. Kosodi etunganan alosit nejai ekapolon loka akwap Lincoln kosodi atemar, "Ejakait Lincoln, erai lo etunganan loerai Ekristoyot. Abu ngesi kokurianar. Esapat loajeni eong iketunga. Abu ngesi okurianar akurianar. Mam ngesi apeleikinit aiswaun nueroko. Abu ngesi oker awai." Ebalu ebe, "Ejakait Lincoln, ejai akaninikon. Ijo bon ipedori aitim nges.

Abu ejakait Lincoln kolema apapula ka ekekalamu, kosodi aidokokin akan ebe, "Kitimoto mutan. Abraham Lincoln."

Kokere ojera, kosodi atemar, "Ena ne. Ayangau eong akonitimio."

35 Kosodi etunganan atemar, "Mam eong akoto asesin ngin. Ti ngin ejaas kede aipucet naepol. Tikerai nginibore kere. Itamit ijo akwenar eong akwenar. Mam eraun Abraham Lincoln. Idiotunganan kere epedori aidokokin akan okirorike. Konye akoto ti korai ebalua loka aipuceteke, kaceda, korai ti kobunite kamakeng." Kosodi etunganan kingainga nges; karaida aomit etunganan lo ajai ojera ebe ajai ngol aboliar nges, ido konyou kolot awai.

Atupuruc natupakini, aponi kinomari nges. Kosodi do akaulo naenomare nges, kojaun do epupe loka akiro adieketa napolon, naarai abu Abraham Lincoln idokokinite akekan isawan akaisarei ka luongon kau ebe aponi itimoi etunganan lo. Kosodi apugan ainomar nges, kwapekwangin. Ikwaikini bo ai? Kotemari adieketa napolon naka akwap naka United States, edolu etube loadieketa napolon, ebe, "Mam aitim eraun aitim arai mam ecamunitai kwape aitim.

36 ido abu Yesu kolak Isirael ko Calvary. Konye mam arai aitimio mamakec, naarai mam apotu kijautu ngin kwape aitim. Konye, kwana kotoma aisisiawok na asabaton akaisakanyaare nu, kidumuni oni ebe

apotu kobongutu kosodete aijaun aitimikec. Konye, abu kolak Ekanisa, aso itimitai do oni naarai ijau oni aokot nuka Yesu Kristo kwape aitimiwok.

37 kwana, idumuni oni ebe arai ngesi elakunanwok lopajan, kosodi kolem eitaabo kakan naka kalo arai Elope. Erai aswamisiot napolon nalakun. Apotu amisiikisi ngin. Kiitunitos yesi aisia? Erai aswamisiot napolon naka alakunio. Erai aswamisiot na emamei ibore yen itirianere. Ebe epuda Edeke aijar kanuka atwanare, kotoma omanikor loka Eden. Kosodi Yesu, ekadoliton, atwanara ido abu Ngesi kiswama aswamisiot napolon, kosodi apedor aibil aipuceta, ka apukor nuajaas tomakec; kosodi aianakin arumet, narai Nakeng, nejaas Iketunga. Aijar namam edaun, nabu Ngesi kirum kanuka aswam ngun, abu Ngesi kotwania Akeijar Elopel, ko Calvary, kosodi atiakiakaikin oni kama kEmoyo lokalaunan. Amen! Emamei etunganan (mam cut) loapedo karaida aomoom nuamin narai ngin, nuabu Ngesi iswama.

Satan, loarai ekeruman kanu aibiror naka omanikor, eburnio aiyen kosodete acakakin angolol naka akim. Adaunos aparasiake

38 Kotoma kojiri, ajaunos Yesu kede imaeta. Apotu kekamutu ngun. Okoku loka Daudi, eiruman kotoma koicolong; Okoku loka Aburaam, ainakanet naka akabakanut; Okoku loka etunganan, ekaruman loka akwapin; Okoku loka Edeke, ekaruna koboro Kere. Ainakinet naka ekabakane!

Kotoma aitutuket nakamojong, mam apedorio-mam apedorio aiting iboro adepar ikar akaisakany. Mam apedorio alemar ibore cut kama ejai ilope obe konye bon akaulo naka ikar akaisakany. Ido apaaran na akaisangon, ataci ngesi etiai. Aparaan na akaisakany, alakunio kede apedor na arai naka Ekanisa, nabu koolio kotoma Omanikor loka Eden, aponi kinyakunai, kosodete aijukakin oni kotoma aibatisao naka Emoyo loka Lokalaunan, kotoma apaaran naikanyet.

39 Kasodete oni alemun na, anunuket. Apotu oni alemutu anunuket, eipone loaponi kikopakiner anunuket ngin Akaninike. Eipone loabu Yeremia, kotoma Yeremia 32:6, okokuke amamaike, kanamel, kojalakina nges airumet. Ido ajaas kesi alosit aijoreoro, naijai oni da alosit toma, kede nges, atupuruc na: aijoreoro. Ido aponi kingadakinai toma obore yenitwasama yenakwap; kitodiarit nejai apedor naka Edeke kede anunuketa ka nuka aiyeyea nuka Edeke, ejenuuio, kotoma otau. Ainapetawok nuka alakunio da, ingadakinaita toma oboro lutwasama luka akwap, Ekiror loka Yesu ka apukokinio.

40 Kidumuni oni ebe aponi ipucakinai na kede aipuceta akanykaarei, ido kanginidiopet kakesi arapiaritai airimun. Ido nadoluna apukokinio, abu Ngesi kiru aipucet, kosodi apukor kosodi aisiom nuabala Aipucet. Kosodi apukor na atupakini, anunuket, kosodi aisiom nuabala Aipucet, ka nuarai apukokonio. Ngupengun becebec nges epote Aipucetawok Akanykaarei, nuijai oni adolokin toma apak naeuriana, imuno oni, ebe ibuni oni. Kanginipucet, nekelemunere koitaabo, abunio apukor, ido ebuni ngin aitoduun cut nuapotu kiswamaunos.

Kidumuni oni ebe ejaas "akanykaarei," akany kotoma anapeta nuka aitajario. Eraas akany. Ejaas akanyaren akany: Apuceta akanykaarei, Imoyon ikanykaarei, Imalaikan Ikanykaarei, Arupepen Akanykaarei ka Aturio akanykaarei nuka Ekanisa. Aso, itei jo, akanyaren akany nges asianut. Ikany nges asianut, ido ikanyarei nges aitekooro. Aso ekeri cut ejok cut bec, itei jo. Eebo.

41 kwape, kanginipucet ebilitai kotoma Akiror naka Edeke, kopukokinete etunganan loka atur, atur ali nakijari oni kotoma, emoyo loka atur, ekanisa loka atur. Apukokinio 10, angeset, idumuni oni ebe aponi kobilai aipucet, kidumuni oni Emalaika ebwoi kede adiopekeju kakwap ka adiofet kangolol, koriorite Akekanin toma Akuj, ka etaluka kokuju Akouke, iyapoi kokiror Kangol Loejari ikar ka ikar, ebe adaun apak, kotoma Aipucet nakawasia. Ido idareu ber ijo kiton neidolokina oni Aipuceta ngun kasodete aanyun nejai Aipucet ngin.

Akaulo na ijo aanyun asabaton akanykaarei, kasodo koany nejaas Aipuceta, "Adaun apak," adaun alakunio, erai kwana Ngesi Engatuny ka ekatubon. Erai Ngesi eketajaranikon atupuruc na, konye apaaran adiofet ebuni araun ekatubonikon.

42 Lo 8 kiton lo 1...ekokoro lo 14 kosula lo 5, epukorit apak naka Imerekek amaio, kotoma Akuj ka kotoma akwap; Eitaabo loipucitai kirwan akanykaarei, Imerekek yenibusakinit, ekalakunan lopajan. Ido kageun okokoro lo 8, kiton lo 14, Emaete Imalaikan Nges, emaete imakio Nges, emaete isuban luajarak Nges. Abu Yokana koma Nges noi kiton atemar, "Kanginisubat kotoma Akuj, kotoma akwap, kwap naka akwap, abu keira eong abala ebe, "Arerengusio, abuses, apedor, acoa, kojaas mama ejai Imerekek." Apak naka amaio naka Ekabaka loerai Imerekek. Kwana, kiitu kodaunite Ekanisa anyoun.

43 kwana apukosi ber oni Daniel, ido kosula lo 9, ikokoron 1 kiton 3. Kasodete alemun esula lo 20 kiton 27, narai erai na ailip naka Daniel. Akoto eong jo ainyogonyog aisiom na, esabiiti kere, kwapekwana, kiton ne imisiikina.

Okaru losodit laka Dario okoku loka...

loka aur naka Imedian, loaraun

*Ekabaka loka ajakanut naka Ikaludean;
kokaru losodit loka airumiteke, abu eong Daniel...-*

abwo, kajenu kanuka itaabon ebe

*etiai loka...ikar luibusakinit atubor aitodolikin
aimejeikin naka Yerusalem
kwape ejaar akirot naka
Ejakait mama ejai enabi Yeremia,
kes ikar akaisakanykaarei.
Kwana (naetupakini) kagipa mama ejai
Ejakit Edeke amoot ailip, ka
ainganga, kekanyi etengei, anapite epuko,
ka ekurwon.
...kelip Ejakait...Ekadeke,
Kalimo kenera,...*

44 Kinyikokini kwaen kwaen, kiton kwana neidolio okokoro lo 20. Kanu ayuun apak, itunga luebwoete, okoto eong yesi apukor 20, kitoni neijesaror okokoro-okokoro lo 20.

*Kosodi nepenerar, kelipi,
alimori da akaronis ka aronis na
ikatunga Isirael, ayait da
aingangaka akonyen nuka Ejakait Ekadeke kanuka
erongat lokalaunan loka Ekedeke.
Eebo, eringa enera kailip,
aponi kitoporounoi atipet
etunganan Gaburiel, loabu kaany
katapoet kageunet, ageun...
kikuny kapak naka ainakinet naka atibong.
Ketejenik, kiner keong,
kotema atiar, "ijo Daniel, alom eong kwana*

aitedesiar jo kotoma aijen."

Dobodo korai kajaasi oni ngina! Ekwaikini ngesi ai edumuni Nges? kotoma ailip.

Emalaika, "etunganan" Kiany ijo, abu ngesi konyarau Ngol, "etunganan ." Ido araut lo...

Ageunet naka aingangakon kolom aicorakineta, abunit eong da alimokin ijo: naarai kiminai noi: aso koomoom akirot, kojen atapoet.

Ecorakin asabaton akaisakanykaarei otungakon korekon da lokalaunan, aitangang adiakar, adaun da aronis aituluc numam adolit namam enangi, aipuc da aitapoet ka adwaranut, ainyonyoikin da aibois nakalaunan noi akinyet.

Ngun kes alosikineta akanykape nuka Akebunore. Kwana koany.

Aso do kojen komisiik, (kopupok kwana) ageun naalomunia aicorakineta ainyakar ka aiduk Yerusalem kiton...ekapolon loinyonyoikinio akinyet, ejaunos asabaton akanykaarei: asabaton da akaisakanykape ka nuarei, kodukoi bobo, irotin ka arwatatin, konye kapakio nuka ican.

...Etuboros ngun akaisakanykape ka nuarei, emudiario loinyonyoikinio akinyet, mam ejaun kibore; emudiarete itunga luka ekapolon loebuni ere ka aibois nakalaunan; ejaun esangeke

kakalele, ejaunos da ijiisio kiton osange; epeleikinitai asimejeikin.

Itogogongi ngesi aitutuket (kopupok) kaluipu adaun asabato adiopet; itanangi asubanit ka ainakinet atutubet naka asabato; ebuni da ngol loisimejeikini kabebenok naka italesio; neebukokinere esange loepeleikinitai mama ejai loisimejeikini.

Kwana, ngin awokosisia kanuka airiamununeta auni, aongon, akany nuetupakinete, kere nuepukori Edeke. "Asabaton akaisakanyaaree."

45 Kwana, abuni eong aillip Doc, arai epedori ngesi, akuar na, aikajakin akabao ngina, tetere epatana eong aigiranakin. Mam eong akoto ijo atwaniar. Kwana ekoto ijo aisisia kede eong, ido aidulokin noi aisisia, arai mam kitwaniari ijo. Ido akoto eong ainomakin ngin kuju abao ne, kosodete yesi ayangaun ikalamunukus ka apapula kosodete aiwadik apaarasia nu, apakio nu, ka kere nuikamunitos ngin.

Kwana, egeunos asabaton akaisakanyaaree (kwana ikam na) akaulo naeyangarere Ekanisa. Kwana, nginitunganan kere emisiikinit ngun, kolim, "Amen." [Kotemari atukos ebe, "Amen."-Ekewa.] Kwana, erai akaulo naeyangarere Ekanisa.

46 Apukokinio 6:1, kiton Apukokinio 19:21, erucokina kede asabaton akaisakanyaaree, kanukangun ekoto oni abwoun kasodete aitetem, eroko oni kinyikokina. Ekoto oni abwoun kasodete aitetem kanukinyo erar asabaton nu akaisakanyaaree. Naarai arai mam ijo ibwouni, itwaniari ijo Aipuceta nu, ibuni ijo atwaniar Arupepen ngun, kitwaniar ijo atanyia ngun, Aiticaneta ngun, imoyon ngul iuni lumam elaete bala aidodikai, Ican ngul iuni, airengeario naka apiu narengan, aberu kotoma akolong, ibuni ijo atwaniar kere, arai mam ijo ibwouni, naarai iswamaunos cut kane kotoma asabato naka akaisakanyaaree. Nen nges kiswamaunor.

47 Kwana, abu enabi Daniel kojai Babulon adaun ikar akaisakanykape. Yesi luipudas aiteluor kau, kosodi aideikin akonakuan apak adio, nayangaik eong e-eteluorit kuju. Ikar akaisakanykape ka lukanyauni! Abu kolot aijoreoro ikar 606 eroko Kristo etwana, ido apak nabunokina nges aitapoet arai-arai 538. 538 agear ko 606 nges akaisakanykape ka lukanyauni. Ikar akaisakanykape ka lukanyauni ajai ngesi Babulon, akidingos naka ikapiirin, konye oroko ejaas kede aipikor. Amen. Mam oni kipedorit adaun esawa ediopet.

Konye ajai ngesi akidingos cut, komamei icetunganan kidimarai ipaupa iuni, ido kojaas kesi aiboisii naugelegela nuka ajaakanut. Konye, Daniel, abwoi bon kede Edeke, abu kitobwo aipikor adaun ikar akaisakanykape ka lukanyauni. Koomoom nuikamunitos ngin! Mam eong akoto agear alimonokin, naarai ebeit na araut Asiraret naka asisianakin. Konye ikar akaisakanykape ka lukanyauni, ericit ngesi aipikor ido mam abu omunaun, akonyen nuka Edeke; komamei aibatisao naka Emoyo Lokalaunan, komameete aokot nuka Yesu Kristo kanu apuronokin kanukeng; kede bon aokot nuka imongin, ka akinei, ka akituk, nuarai nges ainanakin kotoma aiyeyea, kanuka inonosio luka akwap kangin. Aponi kes koyangaarai ngina. Abu Yeremia kodwarite kanukec, ebe abeit kes alosit ngina.

48 Kwana, Daniel, oo, ikatunga, abu nges koany ebe ayapu apak, kwape kijaar oni lolo. Abu Daniel ogeu "amisiikin," ebalala ebe, "kanuka aisiom itaabon."

Kokaru losodit loka airumiteke...Daniel...kotoma airumiteke abu eong Daniel kajenu kanuka itaabon etiai loka...ikar, kwape kajaar...akirot naka Ejakait kama ejai enabi Yeremia, kes ikar aikaisakanykrei kotoma...aisimejeikinio naka Yerusalem.

Abu Yeremia kotoma okar 606 eroko Kristo ketwana, kodwar, kanu adiakaretakec ka amamus ayongit Edeke, ebe apote kesi ajaun ikar akaisakanyaaree.

49 Kiitunitos yesi, ajai enabi ece loabu odakun apaaran kangin. Mam eong apedori eitun ekekiror kosawa kalo. Konye aticepak apedori eong eitun nges kanukus kotoma apak naedit, korai eong apedori abongor ber kau mot. Konye abu ngesi odakuun kosodi atemar, "Yeremia, ibucarit ijo. Elosi Edeke aisibo Isirael kangina adaun bon apaarasia apaarasia nuipu."

Kotema Yeremia, "kojaunos kwangin. "Amen," Ebalala ebe, "Konye kidarok ber mot. Aanyanoros ber oni idiopet ka yenice, kwape inabin." Ebalala ebe, "Kiitu, ajaas ngul luapotu kodwaritos eroko oni, ido apotu kinera iboro luebucara. Ido abu Edeke kiswamanaros ked ekes kanu einer iboro luebucara. Aso ekoto oni etogogongitos. Konye abu Ejakait Edeke alimok eong ebe erai ikar akaisakanyaaree ber.

Abu Edeke osen enabi ngol lokengalat, kosodi aiyar nges okaru ngopengol, naarae alimokinit Edeke Enabi lo lokabeit ebe erai ikar akaisakanyaaree.

50 Ido akoto eong ijo amisiikin eipone loabu Daniel, karaida agitaritai, kojai awai naka iketunga, awai naka ekekanisa, komamei aijanakin karaida adiopet, komamei ediokanisa loloton, komameete ikososinei lu awoio konye koye ngesi elopet kanukeng, akidingos nuka nu kere, abu kosalak edongakina toma kanu abu enabi ngol kolim. Amen! Amen!

Amamei ekanisa loabeit alosit, amamei itunganan yenabeitor aimor eidicane; nginitunganan kere alosi

oyekalun luka ikapiirin, ngininganan amai apotosiakec. Amameete ikososinei luka Ikristayon; amamei itunganan yeneyuunit ibore yeneyuunit ngesi. Ido kotoma okar akaisakanykape ka lukanykauni, anyoun araut etelepat yenikar itomonaarei, itomonaangon lukapolou, nekeyangarere nges ngina, abu ngesi kosalak erai lomunot mama ejai Edeke. Kosodi ajenun kanuka adwaranut ka Yeremia ebe ayapie apaarasia angetakin.

Eipone lotikikwenyara ngin etau loka edionabi lokabeit loka Edeke lolo, ebe kingoliari oni kau kasodete aanyun nuabala enabi lo lokabeit, kasodete ajenun ebe ijai oni apak nawasia.

Ebala ebe, "Abu eong amisiik kanuka itaabon luabu Yeremia, onaceka, ikar luipu noi kau, kodwarite ebe abuni Isirael aiboi kane adaun ikar akaisakanykaarei. Ido eyapie apak ngin adolore." Kosodi ngesi akapakin. Kosodi anyaraar ailung, kosodi aitalaun, ido nea...ekurwon ka epuko, kosodi angapakin akouke, kosodi alosit ailung ka ailip, kanu amisiikin apak najarete kesi kotoma.

51 Ido arai abu Daniel, enabi loka Edeke, koanyana itaabon luka Yeremia, kosodete ayangaun nges toma aiboisit kwape kangin; ebe karaida Isirael anyoun kinga, kere kojarete, alomun kinga nako Babulon, alosit akwapukec, arai idupori ngin nges ailung kede epuko ka ekurwon. Nuitiasi ai tikibusakinit ngin aismamaikin Ekanisa loka Edeke Lokajaran, ajenun ebe ejai apak adaun ido mam bobo ebuni ajaun; ido eyapie abongun naka Ejakait Yesu Kristo, ka apugan naapolon naka ikar Elukumit! Eipone ali kicanicana oni apak, aile epiki, kaipanya kanu iduwes kana asabiiti, emamei apak kanuka Ejakait? Airim bon...Arai kiner ecokon ibore yen kaice yenimam ijo imina, konyouni ijo kosodi alomar kinga. Ido arai edau-arai eyangaiki ekanisa aojau, inyo, ijo-ijo-mam ijo-mam ijo kisimonikina. Kosesen ewokejautene. Kosesen nukiswamai oni.

Kitirian aijarawok kede enabi ngol, etunganan ediopet kotoma ajakanut kere, komameete kede ekanisa loloton, ido amamei cut kanenice kere aboisit nabeit alosit toma. Aponi kere kobilibilaikinai kwap kosodete aicwear; eibugake, iketunga ejotreoritai. Adaun ikar akaisakanykape ka lukanykauni, akaisakanykaarei; edeikina nges ikar iarei.

52 Aso nekegeunia ngesi aisiom toma naka eitaabo kosodi aanyun ebe ayapie apak aitodolikinio, aitodolikinio, abu ngesi kolot mama ejai Edeke kotoma ailip, kanu ajenun nuikamunitos ngin.

Ikoni apak na ai! Inyobo ijai oni aswam? Nejaatatar "Akwapin atiakatiakaun; agatasi angololin; epirisiaros itaun luka itunga kanuka akurian; apakio nuetioko; iboro lu kere eraaas aiwadikaet kotoma arwatat. Atiakatiakaun naka atekerin; iponesio kere luka aronis kiswamasi kotoma akwap; ka ipegeta, ka ijiisinei, angurian. Ka ijiisio ikajasi aikajeta, ebe epedori ikwap idiopet yenididi kwape Cuba kalailo amudiar akwap kere kotoma adakikan atomon. Ido ejaas kesi epegasi adiopet ka nace, itunga lumam eyongitos Edeke lumam ejenete Edeke ido mam ejenete Akepedor.

Ido Emoyo Lokalaunan Kokanisa, elosi kakidingos naka kaluseuna, kitodiar ebe ejari Ngesi akaulo naka ikar ilukumin iarei, ebe erai Ngesi ngopenhol bian, lolo, ka ikar kere. Eipone ali kipalara oni? Eipone ali kipaluna oni ngin? Esawa loebeitor oni aanyanakin, kasesenete esawa ngol loapolon eyapie adolon.

53 Kwana, abu ngesi kosiom Yeremia, esula lo 25. Apukosi kotoma Yeremia, esula lo 5, kasodete aisiom nuabala Yeremia. Nabeit, ageutu kanejai ekokoro lo 8, naarai erai...akoto eong ijo ajenun ejok cut. Ekokoro lo 11 nges loewadikat eong ne kanu aisiom, konye ageutu okokoro lo 8.

Kanuka ngun nges inerar kwanata Ejakait loka ajoresio;

Aminakinit eong ngin. Nakeirara eong enabi enyouni kede EBALA EJAKAIT EDEKE KWANATA, onac, ngesi nen. Kane ajai eong, edaunit ngin. Adaun kanen.

...inera kwanata Ejakait loka ajoresio ebe: naarai mam apotu kopuput akakiro,

Ebala Ejakait ebe, koany ejukari aomare ikekia kere luka ari naka agolitomei, ka Nebukadaresar ekabaka loka Babulon, ekakejaanakinan, koyau kes...aitiji akwap na kangul da luiboiete kotoma, ka atekerin nu kere nuirimorito; ido amudiar cut, ketuluo kes aumokinet, aimuaret, asilio namam edaun...

Kiitu ebe, araas kesi luseuna luka Edeke nges luinera ngesi nukec. Mam ngun araas ikapiirin. Araas ngul imeeban luko okanisa.

Ido bobo, alemari kamakec eporoto lokaiyalama...ka eporoto lokaillel, (kwape kijaar oni lolo, kere erai emusik loka rok kede rol, Ricky ka Elvis,) eporoto loka eteran,... ka eporoto loka ikweny...arai, atemasi ateran, aruo naka akangas,...ka aica naka atala.

Ido itisilio akwap na kere,...

Kopupok enabi iworoi, "Akwap na kere itisilio!" ido mere aituput ejaanakinan lo lokapolon loka Edeke, konye ajai eong aidwar ebe itisilio akwap na kere. Abuni Edeke aitisilaar akwap na kanuka adikanaretake. Arai mam Edeke abu koosik Isirael, luseunake, aur naka Aburaam, loabu Ngesi

kiswamatar aitutukete ka aisumunet, arai mam Nges abu kocamak kes aiku kede akeceswamasio nuaronok; karaida idiinikitos kesi noi, kojaas kede ikanisan luapolok, ka isasedotin, ka ikesisianakinak; konye kanuka aronisio ka iboro akidingosikec, kosodi Edeke ainakin kes aisak nuapotu kesi koyeikisi, kwape kwangin kidumuna oni da. Ekokoro lo 11:

...itisilio akwap na kere, ido...aumokinet;...

Nges atemar nginiitunganan kere engoliari kosodi atemar, "Engun. Apolok kesi noi. Kosesen do kes kwana."

...ijaanakinete da atekerin nu ekabaka loko Babulon ikar akaisakanykaarei.

Arai ngin angetakin aijar kere. Erai nen imojong ijo, arai toto naisirerengitai neamojongit imukeru. Ajaas kesi toma ngina komamei Edeke, komamei ekanisa, komamei ekosio, komamei idiobore, adaun atur adiopet kere, kiton atur ngin nadiakanaran kere atwakare'

Kosodi kanen ebala Ejakait ebe, kedaunos ikar akaisakanykaarei, kosodi eticani eong ekabaka loko Babulon, ka ateker ngin, ka akwap naka Ikaludean, kanuka numam adolitikec, etisili ikar kere

Ido ayauni kakwap ngin akakiro kere nuabu kenerite, kere nuewadikatai oitabo lo, loadwari Yeremia mama ejaas atekerin kere.

Naarai atekerin nuipu ka ikabakan lukapolok itubusianete kes, eebo, kes da ba; atacakin kwape ejaatar aswamasiokec, ido kwape ejaar aswam naka akaninikec.

Naarai kabala kwanata Ejakait Edeke loka Isirael ebe: kolem adere na naka ebino loka adedeng kakanika, kitamat atekerin kere nukejukari ijo.

Kacekiro, Yeremia, kainak eong ijo aisiraret na. Mam iboikin ainapakin. Mam isalakini aiboisit adiopet, konye kodwarak akwapisinei kere." Itupakinitos yesi ngin? [Kotemari atukos ebe, "Amen."-Ekewa.] Adwaranut mama ejaas akwapin kere. Kitodia akaanyuneta ka nukaumokin, ido kitejenik kes ebe abunit eong aswam nu."

Emasete, igetanaros, ikerepikinete kanuka akirot loejukar eong mamakec.

54 Ali bo nuiswmaete kesi kotoma apaarasia nuka lolo? Enyaritos ijo ebe e-enabi loengalat, enyaritos ijo ebe lo-loibambami akiro, enyaritos ijo ebe lo-loitolitoluna, ekadwaran, arai ekarujan arujasia, arai loisubit bala emunara akou. "Epote abangakar!" Ido akirot ebe ebang arai ibilibil ijo ejok erai akepolou "loemunara" "Igurwokinokos kiton atemar, 'Aaa, mam ipupokinete loitolitoluna ngol, loemamei aijen ngol,' kanu Akirot naejukuni eong akidingosikec."

55 Iseseni ijo akiro nukolosek inyogoikinos bobo aiswamaun? Mam Yeremia epedori acamanar kede Iparisayon, Isadukayon, Irodean, kere nueraas kesi. Abu ngesi kolim Akirot kinga alimun, ido abu ngin koinak kes kere itolitolunos kanu ikamunitos nges. Inyo? Kwana, kaony.

Kasodi alemun adere kakan naka Ejakait, ketamat atekerin,...

Mam Yeremia abu kosalak ore. Mam Yeremia abu kosalak aiboi aiboisit adiopet, konye abu koinak akwapin kere aimat ngin.

...nukakejukari Ejakait eong:

56 Abu Yeremia kolem Akirot naka Ejakait, ebino loka Akekirot. Ido ebino nges apedor naka Akekirot. Ejaatatar ebino apedor. Erai ebino enyonyoikinan. Ejaatatar ebino apedor kauke. "Ido alem eong Akirot naka Edeke," abala Yeremia, "kasodi aitodiar. Ebino, apedor naejai tomake, abu eong etodia akonyenekec, konye mam apotu kiirasi."

Abala Edeke ebe, "Aso abuni do eong aijukar kes Babulon adaun ikar akaisakanykaarei." Ngun kes nuabu Ngesi kiswamaun. Ikadolitok ka lumam edolito kere apotu kolototo.

57 Kwana, abongor toma aisisia. Abu Daniel kosiomenenei. Koomoom ber ijo, abu Daniel kosiom akiro nupekijai oni aisiom atupuruc na. Abu Daniel kosiom Ebaibuli lopelo, ewadikae lopeputo, ikokoron lupelu, iboro lupe ajai eong aisiom, kede aigange naka Edeke, abuni eong asiomakin ijo kotoma Aisiranareta adis nuetupanakinete, ibore ngipengin, aitodikin ijo ebe ijai oni toma apak nakawasia.

Ido Daniel, elemuni Akirot kama ejai Yeremia, kijesar kiton Babulon. Ido arai ngesi enabi loenyonyoikinitai. Ido abu kiswama nukapedor, aanyununeta, apedori aijul angejepa numam ajenas, ka aswam aanyununeta ka nukaumokin akidingosikec. Konye kerek, kobwoi bon, kanukeng! Amen! Abu kobwo bon.

58 Konye abu Yeremia kiwadikate akiro nu ikar luipu kau. Kosodi Daniel aijulun Akirot, ajaas... "Ebala, kidarok mot. Iyapik oni apak nakawasia, kwana naarai ajaun eong ne adaun ikar akaisakanykape ka lukanykauni. Ido abu enabi loka Ejakait," amen "onaceka, enabi lokabeit loka Edeke loabu kitogogong ebe arai ngesi enabi, kodwarak oni. Ajaatatar eong kiwadikatai ne toma oitaabo, neabala ebe, 'Epote ikar akaisakanykaarei angetakin.' Wu Ejakait Edeke, ayapia oni angeset. Atwana atur ngin kere. Inyo kwana ibuni ijo aswam, Ejakait? Isumunikit Ijo aijukakin isio..." kosodi ngesi akapanakin, ailip.

59 Wu Edeke, arai ejai apak natikibusakinitor isio akapanakin, ailip, erai kwana. Naarai, isio kwape Ikebulesin, kiseseni, kanuka ibaluan luka ikiyakia, kanuka akwenyanareta nuka Emoyo Lokalaunan, ebe ijai isio apaaran nakawasia. Inera Emoyo Lokalaunan, "Ebe kotoma apaarasia nukawasia, eraunos itunga luemositos, luiketara, lueminas aitelelio itia amin Edeke, abilak ibotei, luetubokinete atai akiro, lumam isimonikina, luemwangito ngul lukajokak" Abu eong amisiik kanuka ebalua.

60 Ido amisiikinit eong ebe epote ipeen, kotoma apak nawasia. Amisiikinit eong abuni ajaun akwap asurokin akwap, kotoma apak nawasia. Amisiikinit eong epote ajaun ikwamin luekusete angololin, kotoma apak nawasia. Amisiikinit eong epote ajaun aanyununeta nuka etasuro atakanunun, kwape nat iboro lueporitos, kotoma Akuj, aanyununeta nuitukurianete, ido epote itauon luka itunga aipirisiar kanuka akurian. Epote apaarasia nuetioko, ka aridakinio akidingos naka itunga. Asiami eong ebe epote kere alosit toma Atukosia ka idiinin, kosodete ajaun kede aimorumun, kotoma apak nawasia. Amisiikinit eong ebe epote angor aitubonor ikecetim kotoma apak nawasia. Amisiikinit eong ebe epote ainap inapen lueuriaka, ka alosit kede amuk nuicegegete, odoanaros kwape kelosio, kotoma apak nawasia. Amisiikinit eong ebe ijusun aisinyikokinio kwap noi kotoma apak nawasia, amisiikinit eong ebe epote ikalimonokinak araun ecokok luengalak kotoma apak nakawasia, luepote aibambam akiro, ido mam epote aitan itunga kede Akirot naka Edeke, konye epote atupar italesio ka iboro, aiboisit. Konye amisiikinit eong ebe ebuni ajaun Eporoto loebuni apaarasia nukawasia, emonyi amoding, enyarit itunga abongun mama ejai Aisitarete nageunet, abongor mama ejaas iboro luka Edeke. Amisiikinit eong kanuka eitaabo ebe, iswamaunos iboro ngul.

61 Amisiikinit eong kotoma apaarasia nukawasia ejaun ebeli. Epote ikanisan araut luetukokina ido kibwaikitete ainapeta ka nginibore kere, ebe kotoma apaarasia nukawasia ejaun ebeli, ido mam ebuni araun ebeli loka inyamat kakipi bon, konye loka airar Akirot naka Edeke. Ido epote itunga ikerit kide, to, agolitomei, ka angalakimak, emootos akiirar Akirot naka abeit naka Edeke. Konye epote ikanisan araut luetukokina ido koridakina, ebe ebuni aimwang airar ngin. Amisiikinit eong ngin kanuka itaabaon. Konye kapaaran kangin, Wu Edeke, ebuni etenu alibun kamaka Daudi.

Amisiikinit eong ebe ebuni Ngesi aijukun Eliya eroko apak ebuno kotoma apak nawasia, ido ebuni ngesi ajaun kede Aisiret naebuni aibelokin itauon luka idwe kiton nejaas luka papa, ainyakar kesi kiton ageunet, obongosi bobo kiton angeset, kosodete ageun. Amisiikinit eong ebe epote ngun aiswamaun eroko Emoyo ejalakina ekanisa loka Imo, abongor nejaas Iyudayan.

62 Mam eong amisiikinit bon kanuka Enyukuta. Amisiikinit eong kanuka Akirot, kanuka Akirot naiwadikatai, ebe ebuni Isirael abongor toma akwapukec; ido aseseni eong nges ebongori.

Amisiikinit eong kanuka Ibaluan, luka inabin, ebe ebuni Isirael araun akwap. Epote aitemun asipokin eyekalu loka aima. Ebuni Edeke abongor aiswamanar kede nges bobo ebongo ngesi toma akwapuke. Oo! Epote inabin iarei anyoun kotoma apaarasia nukawasia, kede kes. Amisiikinit eong ngin. Napekenyouni Ekanisa loka Imo, epote inabin iarei anyoun, Elisa ka Musa, mama ejai Isirael. Ibuni adumun ngin kwape kilosio.

Abu enabi koany apak eyapie aitodolikin kalaije ko Babulon. Abeit.

63 Kotakanuni Gabriel, kanu apukor mere bon nuelipit ngesi, konye alimokin nges kere nuaponi kibwaikinai kanuka ateker naka Iyudayan, angetar kere kiton angetakin. Amen! Abu ngesi kingit mot, ido abu kodum nginibore kere. Abu ngesi kilip ajenun bon...

Atamit Daniel ajenun, "Aojau anyoin, Ejakait ebuni ayangaikin kwana? Adwarit Yeremia enabi, Ekonibulesit, onaceka, ikar akaisakanykape ka lukanykauni kau, kobala ebe, "ejaas ikar akaisakanykaarei luepote itunga lu aiboi kane." Atur namojong kere aeke kwana."

64 Ejai atur namojong naka Pentekosit nabu konyou, ikar akaisaongon kau. "Ikajiok lumojong," anyaraunitai kes. Apotu kiswamautu atukos, kosodete ejie, ka epeget, kere kiton Moru Koreb ka Nebo, kiton ngina. Konye, angeset, ijai kwana oni ocilet. Elosi Ngesi atonyoun loitetet, kede Yosua kanu ayangar kes ngina. Abu komen ekisil; abu Musa kolototo kede ngul; abu Musa kibiror. Abu Yosua koyanga kes. Idumuni oni ebe akurwoki atukosia, konye Emoyo loka Edeke...Yosua, akirot Yosua, akepolou "Yesu eketajaraniwok." Ebe ebuni Emoyo Lokalaunan alomun toma okanisa mere atukos, konye ebuni Emoyo Lokalaunan alomun akidingos naka itunga kosodi aisikapikin ngin alosit kuju, juwai naka Yorodan. Amisiikinit eong kanuka aisiom eitaabo ebe ngun kes ebeit aiswamaun. Ido ejeni Edeke ebe ngun kes amoot eong kwape kwana, tetere eong esinapikini Iketunga kasodi alimokin kes nuejaas, kane atupuruc

na ka kinga anatar akwap nepote atEEPUN nu alosit, akwap kere, ebe kijai oni apak nawasia.

65 Abu Ngesi kopuko erot kere kiton neangetakinere ainyakakakin akabakanut kosodete asipokin apugan naka ikar elukumit. Ngin nges arai aisiraret naka Gabriel. Abala Ngesi ebe "Abunit eong alimokin ijo ebe ajaas ikar akaisakanykaarei, asabaton akaisakanykaarei, ber, nuadaun aicorakin otungakon, icorakinitali kiton angeset naka atur naka Iyudayan. Eraas nu asabaton akaisakanykaarei." Kwana kosesen nuabala Ngesi. Ebe kwana, kiton agear alosit ainyakakin...

Ecorakin asabaton akaisakanykaarei otungakon ka ore...kon,...

"Korekon." Mam Babulon arai oreke. Ingaibo...Aibo ajai eibugake? Yerusalem.

66 Kwana, nekidolokina oni toma-toma akanykaarei, arai aitogogongoro naka aibunget naejaas akanykape toma, ibuni oni ajenun loerai eibuga ngol kasodi aijesun kwap cut kasodete aitogogong ingai arai ngesi, ingai kegeuni nges, nekebungio. Ebuni aibwo adaun apak anyoin? Ngol eponio aitemun aiduk bobo? Kotoma apak anyoin? Oo, ejaas iboro luapolok aingadis kanuwok. Eebo.

Ecorakin asabaton akaisakanykaarei otungakon ka korekon, aitanang adiakar,...

Kwana, mam Nges abu kotema ebe, "Daniel..." Komam abunonokin nuabu Ngesi kolimok ngol ebe asabaton akaisakanykaarei araas...Apeleikinit eong, ayapiete asabaton akaisakanykaarei adaun. Akaisakanykape ka lukanyauni, akaditos ikar iarei bon. Ido idumuni oni ebe adwarasitike ka Yeremia abu kobeik cut toma becebec. Akaulo naka ikar iarei, apotu kesi konyoutu. Abu Nekemia kolot kosodi adumun aicorakineta kama ejai ekabaka, kosodi aiduk arwatat kotoma apak naka ican. Apotu kiswamata. Ebal ebe, "Arwatat..." kopupok nu.

...aitanang adiaknareta, ...adaun da aronisio,...

"Adaun da aronisio." Mama ejai ingai? Iyudayan. "Ecorakin otungakon," mere nejaas Imo. "Otungakon," Iyudayan. "Korekon," mere New York, mere Boston, Philadelphia, Chicago, Los Angeles, Rome. Konye "Korekon," Yerusalem.

...ido aitanang adiakar, ...adaun aronisio, ...aituluc numam adolit, ainun adolit namam enangi, ka aipucar aitapoet ka ainyonyoikin da aibois nakalaunan noi akinyet (kosesen!)

Aso do kojen ido komisiik, ageun naalomunia aicorakineta ainyakar ka aiduk Yerusalem (ali bo arai ere) kiton ekapolon loinyonyoikinio akinyet, ejaunos asabaton akanykaarei (kotoma asabaton akaisakanykaarei,...

67 Kidareu kiton nekidolokina oni ngin! Oo, ikatunga erai ngin arereng na alosi-alosi eong adumun auno kasodi aenekin akakuan aboisit ngin kane.

Abu kopuko ngin kere, ebal ebe, mam alosi alimokin ijo kwana ebe ikar ngul iarei eyapiete, epote angetakin, aitodolikinio." Ido kijeni kere ebe apotu kesi kojaas ngina ikar akaisakanykaarei, kosodete-kosodete anyoun, becebec nuabala enabi. Ido Isaia, arai apeleikinit eong...Eyuunit Daniel enabi ngol, aso ajai ngesi ne, ekapakina. Eebo. Kosodi nges...

Ido kwana, neabunio Gabriel, abu kotema ebe, "Abunit eong aitodikin ijo erot kere, apukokin ijo iboro lu, ebe, erot kere kiton angeset." Kiany? Koany.

...etal emudiari Ngesi kiton angetakineta naka iboro kere,...

Angeset nges "esange loiboro kere."

68 Alosi eong aitodikin yes nuepote aiswamaun." Kwana opupok. Ikam ngin! "Eong...Daniel, ejukunitai eong. Iminai ijo kotoma Akuj. Ido abu keira akonilip ido abu eong kwap kwana alimokin ijo nuicorakinitali kanuka Iyudayan ka Yerusalem, anyoun kwape kwana kiton osange, ibore yenetupakini."

Kwana, imisiikisi yesi, atukot? Korai apedorete oni aanyun nueraas asabaton akaisakanykaarei nu, ijeni nedoluna esange. Oo, ikatunga! Ingarak oni Edeke ajenun ngin. Elimokinit oni cut ejok kanenice kotoma apapulai kanu, cut ageun kapak kangin kiton apak na, kiton angeset, ido mam ebuni ailamar karaida idakikat idiopet da.

69 Eipone loabu Akirot nakaumokin naka Edeke...Neabu Edeke kosubia akwap kosodi asipokin ngin kotoma apak. Ido alimonokini eong akuar ya, akuar kanaesabiiti, eipone loemameor idiobore yenibiror. Kanukinyo, itekoora eipone loirimonora akwap na kiton nepedoriatu kwi alimokin ijo apak nairiamakinotor akolong kede elap, ikar akaisarei anyoun lolo, kiton idakikat. Mam eong apedori alimokin ijo, ka idiobore kere yenijaar oni yenimarere apak kakwap kana; elemari adagikan aarei arai auni kotoma olap, arai aiyatakin aarei arai auni, luajokak kakere lujaatatatar oni. Mam oni kipedori aiswamaun idiobore yenitekoora kwangin. Naarai ejai ibore idiopet bon yenitekoora, ngesi Edeke. Ido Edeke ka Akekirot eraas idiopet, aso itekoora akirot naka Edeke

Ido arai kipedori oni amisiikin apaarasia nu, ibuni do oni ajenun apak naejaunor esange lokanginibore kere. Ijo ikam ngin? [Kotemari atukos ebe, "Amen."-Ekewa.] "Icorakinitai kiton osange." Ekokoro lo 24, "otungakon ka Korekon lokalaunan," loera i Yerusalem. Ejaas ikokoron 21...24 ne. Abu Yesu kijulir nu ko Matayo 24.

70 Kwana, Onac Collins, arai ejai Ngesi ne atupuruc na, mam eong ajeni arai ejai arai mam. Kotoma aingiseta akuar ya, abu ngesi kingit aingiset. (Aomit eong edolit eong alimun ngin Onac Collins.) Nuikamunitos, "Etal loeyangauni amudiario, i itei jo, nuarai akepolou?"

Abu Yesu kiner nukeng, kotoma Matayo esula lo 24, ido kidumuni oni. Eebo, Matayo 24:15. Kwana ber eong alem ngin katipet cut, tetere ijo kianyuni inyobo, enera Yesu nupe ibore kangipekangin kane, ijulirai kau nejai Daniel. Matayo 24:15, ijo yeniwadikai. Akoto eong ijo, nginidiopet kwana, atelekarit atibong n aka asabiiti naetupakini, ayangaun ikalamun ngun ka apapulai, naarai ijai oni...arai canat kijaatar ijo ateepeu. Ikokoron 24 ka 25 "Kosodi do neki..."

Ido naianyunia ijo etal loemudiari lokinerit enabi Daniel,...

Koomoom! Erai ne ikar ikwataongon kede akaisakanyauni ka luuni,-iwongon, -ikany, akaisakanyauni ka lukanykape kau. Akwataongon ka akaisakanyauni ka lukanykape kau.

...enabi Daniel ebwoi kotoma aibois nakalaunan,...

Kwana kosesen kotoma Obaibuli. Erai kotoma aiyeyea.

...(Kojenu ikasioman:)

71 Kwana, kinera Ngesi mam ejaas Iyudayan. Ekotosi kesi ajenun, "Dobodo eyekalu lo? Iwori bo emudiarere? Iwori bo itemunere aiduk? Iwori bo edoluna apak naemameuna amoru naidoko kokuju kama kanace? Aojau anyoin edauni?"

Ebala ebe, "Nekianyuniata yesi etal loemudiari ebwoi neabu..." Daniel, 'abwoi kotoma aiboisit nakalaunan.'" Ebala, "Naianyuniata nu itodolikinon, kwana kojenu ikasioman nuinera ngesi."00

Ngin nges apolou nailipitor oni Edeke, aisitekoor ngin, ebe emameun editorube loka abunonkin. Naarai, mam ebeit oni aibwaikin aijulunetewok nejaas iboro ngul. Ekoto kobu kama EBALA EJAKAIT KWANATA. Ajalakinit eong ngin cut kanen kiton neamisiikina eong.

Abu kopukok nges iboro kere, "etal" ngol.

72 Ido, kiitu, ejaatatar kede apolou naedeperit adiopet, eputosi kede, "Anyarauni okokuka Komisiri." Kwape kanyaraunere Isirael kinga, kwape kwangin anyaraunere Yesu da, Okokuke.

Ido ngupengun cut kes epote aiswamaun, kidelelete kwape kabwoio eong kane. Ido abu Ngesi kiswamau ngul koipone kangol, ido ebwa Ngesi ngun kere, kere ibwaitai kama ejai Ekanisa. Oo, nakidolokina oni toma kangun, toma amisiikin, aibunget naka akiro akanykape, eipone loebwaia Ngesi nu kere kama ejai Ekanisa, tetere Ekanisa ebuni asesen ngin kanginidakikat, mam ajeni apak naabeitor Nges abunore. Konye kwana eyapie atur angetakin, aso ekapakina do kwana kanuka abunore, ejai akapanakin.

73 Erai lo ekokoro ediopet loepol noi Koitaabo. Inyobo iswamai ngesi? Inera nuka angetakineta naka ateker naka Iyudayan, itunga luyudayan. Ekokoro lo, asabaton akaisakanyaare, elimorit ido inera cut agear apak nageunia Daniel kangina, kiton angetakineta naka iboro kere. Erai lo ediopet kotoma akalenda nukapolok kakere. Imwasi bo ai kiiraritor eong abala ebe, "Arai ikoto ijo ajenun apak naka esabiiti, kongolia akalenda. Arai ikoto ijo ajenun apak najari oni kotoma, kosesen Iyudayan."? Erai ngin nakabeit. Ngin nges akalenda naka Edeke, esiomio kanepokane. Kanginisioman akiro nuka ediini, kanginisioman Ebaibuli, idiotunganan, elimokini ijo ebe erai akalenda, Iyudayan.

Kwana apak anyoik kijaatatar oni? Irai oni...itunga, emwana, Oo, eong...

Mam ngin ikamanara kede Imo; Aipuceta nu akanyaare, Aiticaneta akanyaare, Ican ikanyaare, Arupepen akanyaare, imamei ibore idiopet da yenikamunitos. Edumuni Imo edautu aekar toma aibuses kapak kangin. Mam cut ikamanara kede oni, Ekanisa loka Imo. Ikamanara ngin kede Isirael bon. "Daniel, ikonitunga ka Yerusalem."

74 Kwana, itacaunit abeit ebe iswamanaros bon Edeke kede Iyudayan kojaas akwapukec. Aleluia! Nen nges aomit eong abu obeikina toma cut, nen cut.

Etamitos duc kesi acamanakin anyoun apak najaar Isirael ngina kotoma apakio naka Dsniel. Ido ekewadikan ediopet loapolon...naarai, ajeni eong ekekatupitokoke luiboiete kane, mam eong abuni alimun ngin. Konye ngin nges apolou naetingitor kesi iboro lu kere luka aingal.

75 Ijenete lem yesi eipone loapotu atupitokoke Miller, eroko erauna Seventh-day Adventists, nuapotu

kiswamata kane? Okar 1919, kopotu kolemutu abebenokakec, (Kianyunitos yesi kere kotoma apapula naiyemuto naenyaritari Courier) kosodete abunore ne kanu aporor, atupuruc ngin. Arai ngin alemun asabaton akaisakanykaarei nuka Daniel. Ahaa, luka Miller. Kosodi, do akaulo, kede Amucalat Ellen White, naarai anabikec, kibelokinos kosodete anyaraikin Seventh-day Adventists. Ido kwana ejulakisi ekecekiror araun Eporoto loka Aidwar. Kiany? Ikiroria iuni luegelegela kanuka itukot idiopet.

76 Kwana, konye ebucaritos kesi, atamitos kesi aitwasam asabaton ngun akaisakanykaarei nuka Daniel kanuka Imo ka Iyudayan da. Ido ebala Ngesi kane ebe, "erai kanuka Itungakon." Ido mam Edeke kiswamanarar kede Eyudayat kinga nako Palestine. Ido naamudiarere Mesia kotoma asaboto naka akaisakanykaarei ka luarei, (Mere kanuKeng; kanuwok, nges amudiarere), esiarakina Isirael, ido mam (mam cut) abongunitotor akwapukec kiton bian ikar idis kau. Aso, mam apak emaritari kotoma kangina kanuka Atur naka Ekanisa. Imisiikisi yesi ngin? [Kotemari atukos ebe, "Amen."-Ekewa.]

Mam tikepedo araun 1919. Apedori eong aitoduun icebore yenabuniswamaun 1919, konye erai nen toma apak nabu Emalaika ngol, neadoluna aisiraret naka Emalaika lokiuniet kosodete ican adakun. Becebec. Konye mam arai e...Arai nen neabu ejie kobwouna koipone kalo etegelikina. Idumakini oni ngun toma osula lo 7 kidolok oni nen, kidolok oni osula lo 7. Kiiraritos yesi kere eong alimonokini ngun, kirwanapu, itei jo, neabalar aisiraret naka Emalaika ebe, "Kitobwou ikwamin iwongon luka akwap kiton neipucakina isio Iyudayan, ibulesin." Ido kwana, apotu kinyikokisi aidarit kiton naadaunor atur naka Imo kere.

Ido naalomuna Ngesi toma, kisiboikini do-kisiboikini do Ngesi Iyudayan, ilukumin akwatat akaisaongon ka luongon edumunitos Emoyo Lokalaunan. Ejaas ilukumin akwatat akaisaongon ka luongon, luipucakinitai. Apukokinio 7. Kisiomitos yesi ngin.

Kasodi kaany ekodet loepol noi luajaas sek toma Akuj," abu Yokana koany, "Nginijena, angajepa, ka atekerin, ebwoete koingaren keicolong kakonyen da nuka Edeke, kede amusog kakaninikec, konapitos inapen lukakwangak, kowoete, Aleluia! Amen! Aibuses, acoa, ayongio, agogong, apedor, ojai mam ejai Edekekosi ikar ka ikar Amen! Kiluluete."

77 Mam ber Yokana apedori amisiikin kapak kangin. Konye kiteluo kau ido koany Komoru Sinai, (aibuses) ilukumin akwatat akaisaongon ka luongon lumam amunauna kede angor. Angor! nuka Iyudayan, ikanisan! Mam alomaritos atukos adio, Lutheran, Methodist, Baptist, ka Presbyterian. Konye araaas Iyudayan kageunet, Orthodox, ido kojaatar ekeceyekalu ngina, komaete Komoru Sinai. Ngun kes ilukumin akwatat akaisaongon ka luongon. Erai do nen akaulo kanu; ojai Ekanisa toma Aibuses. Itei jo?

Aso, ebucarit Ejakait Smith, ebucarit. Naarai eipone ali itamakina ijo aitwasam ngin kokau kane 1919, alemar awai ilukumin akwatat akaisaongon ka luongon? Ibongo do ijo aitup Russell bobo. Itei jo? Ibongo do ijo aitup aisisianakin naka Russell bobo, ebe, abu Yesu kobo okar lo 1914, 1919 abu koyanga Ekekanisa, ido kwana erai Ngesi akuan naka Aiyeyea arimomor akwap kere, konyou...kolot ates atata ka ates paapa, kosodi aitonyounun kes kere, kere ngul luaraas luka Russell." Tai! Mam itolomuni aijen kotoma akwap. Mam elomuni ejok. Mam, ipa. Mam elomuni.

78 Konye, ejaatar Edeke abeit. Ido Edeke bon Ngesi epedori apukor ngin kosodi asipokin ngin toma nen, kosodi aitodiar ngin cut becebec, mamawok. Itei jo? Eyuunit eong ebe ebuni Ngesi aswam ngin. Mam eong ajeni. Ajai eong alimonokin yesi Abeit. Mam eong ajeni, konye eyuunit eong. Eyuunit eong ebuni Ngesi aswam ngun.

Aso, itei jo, mam Edeke kiswamanarar kede Iyudayan. (Akoto eong ijo aidar na aomisiokon)

79 Nen nges abu eong atamitor alimokin onac loiboie kane, loinera nuka alosit Isirael, ikunya awai kanejai Isirael! Ikunya awai kanejai ngin, yesi kere itunga luineraas nuka aibelokin Iyudayan. Eroko Aisiraret na enetakina, ibuni ijo aanyun ebe erai EBALA EJAKAIT KWANATA, kanuka Akivot ka Emoyo. Eponio aibelokin Isirael, akwap kere, kotoma akuar adiopet. Abala Ebaibuli kwangin. Konye mam eijiri erai kanukec da. Ejaas itepegak idis luejaas kinga, kaiceda kwangin, luelomunete toma, ka kokinga naka akuan napolon naka Iyudayan, luelomunete toma kosodete aitajarun. Erai ngin nakabeit. Eyuunit eong ngin kede eka-ekatau kere.

Konye, kiitu, anyoun naejaar Isirael kinga naka akwapukec, mam epedorio aitajar kes. Kwana ejaas kesi abongor. Ido eponio kes aitajar, akwap kere, kotoma apaaran adiopet. Abala ebaibuli kwangin. Apaaran adiopet; inyakuni Isirael kere, cut, mama ejai Edeke. Ejaun ibore yenapedor naepol yenebuni ainom Isirael adiopet kotoma apaarasia kanu, kiton ajangakin akwap kere. Abu enabi da iluluk, kobala ebe, "iswama ijo nu kotoma apaaran adiopet." Epote kesi aanyun, kotoma apaaran adiopet. Ebuni ajaun ibore yenapedor naepol.

80 Akeomisioit, ebuni araut enabi loepol agogong nges ebuni anyoun kosodi aibwo kakonyen nuka Isirael, kosodi aitogogongoikin kes ebe eroko Mesia ngol ejari. Mesia loapotu kesi ongeroto e...?...

Esiomete kwana kesi Ebaibuli ngol, Ebaibuli loka Isirael. Esiomete kesi agear okau alosit ngaren,

eipone loesiomata kesi. Ido ijeni ijo eipone loiwadikaere angejep naka Iyudayan. Aso naesiomata kesi...Ido esiomete kesi ebe abu Lewi Pethrus ngol ijukak kes Ibaibulin emilioni. Kotemas ebe, "arai Yesu lo..." Araas kesi Iyudayan ngul luetopolounitai ko Iran, ido kangina, mam apupunitotor ibore kangin ebe Mesia. Naakapakinotor kesi abongun akwapukec, inyobo, mam apedorete adokar odegei ngul. Aroko akoriete kede imelekes lumojongik. Kisiomitos yesi kotoma apapula naka iyemuto. Imwasi ai esiomitos akiro ngun kotoma apapula naka iyemuto naenyaritai Look and Times-...? Inyo, abeit kisiomitos yesi. Itei jo? Mam apedorete adolore ngina. Abu ekesisianikinan ngol lomojong kobwo kangina ido kobala ebe "kiitutu, abala ewokenabi ebe ibuni oni abongor toma akwapuwok kokuju naka abebenoka nuka emorukalet." Aleluia!

Abibilunos, ejai Isiraelin akwenyun,
Aanyuneta nuadwarit Ebaibuli;
Imarasi apaarasia nuka Imo, ilelebasi kede aimony;
"Obongutu, Wu luisiarakina, otungakus."

Ekoto ojaas akwenyun. Kiiras, ido kiiras, ido kiiras, konye araun kirwan nawasia, adiopet kotoma apaarasia kanu.

81 Ejai Isirael abongor akwapukec. Apaaran na esipokina Edeke Isirael kwape akwap, ngin nges opak namam bobo ejaunor imoit ice yenitajario.

Abuni eong aitogogongoor kotoma asabaton akaisakanykaarei, arai bon apedo eong adumun apaarasia ngun. Ajai eong alosit...adumun akalendan nuesiomere akiro nu akwap kere, kosodi-kosodi na Julian, naakwap kere, kede na Iromayon, ka nuce kere. Ejaas ace nuipu nenice. Ejai icebore. Ejeni Edeke nuke. Ido, epedori-epedori apukor ngin. Itei jo? Ajeni eong akalendake Julian ejaas kede akwatauni kede akaisakanykape ka lukany ka apaaran adiopet naongonet kotoma okar. Aso, oo, igurwokina kesi kere, konye ejai abeit, nenice.

82 Aseseni eong ikanisan luipu, atukosia nuipu, itunga luipu elosete kwana, ka ice, "Iyogaete Maria," ice emaete lo ka ngol, ka je. Ekoto kojai abeit, nenice. Ekoto ojai Edeke nenice. Ekoto ojai Aisiraret nenice. Aseseni eong inabin luka engalak enyounenete, iswamaete bala amisiikin aomisio, ka luce iboro da kere elosete ngaren. Akepolou ekoto ojai yenabeit, nenice, yeniswamautere ngin yenaingal.

83 Aseseni eong itunga elomarete akuan, kocelanos, kinyikokinitos, kolosete kinga aijar iponesio kere luka aijar. Ekoto ojai Emoyo lokalaunan loka abeit ngina, nenice. Etei eong itunga isubitos bala idiinikitos, kaceda, kotamitos aiyapaara. Ajeni eong ebe ejai Edeke lokabeit nenice. Ejai Emoyo lokabeit, nenice, naarai erai ngol loesoswai lokolosek, loiswamaunitai aiswamaun kotomake, lomam erai lokabeit. Ekoto ojai ibore yenerai ilopet: etunganan, itunga, ekanisa, Edeke. Ekoto ojai ibore yenerai yenabeit, nenice, naarai erai na naitupusitere ngin, ejai ibore ilopet nenice.

Abu eong alimok ekanisa lo, nuikamunitos ainakinetakus. [Onangi Onac Branham elutaari irwanaongon-Ekewa.] Kopupokisi ainakinetakus; kidarata kes kotoma Obaibuli. Mam icamunete nukaingal ileleba akuj kede nukabeit. Aricata nukabeit. Adumutu nukabeit arai mam mam do ijaun kede adio kere. Amen.

84 Kwana, agolokinet, erai abeit ebe iswamanaros Edeke kede Isirael bon nejaar akwapukec. Aanyutu ber oni neabu Edeke...Abu Aburaam konyou kakwap kosodi alosit ngina Misiri, inyo kobu iswamaun? Abu ngesi konyou awai kotoma akote naka Edeke, ido mam cut aponi kisirerengeo kiton neabonguna ngesi ore. Ido mam Edeke abu kiswamanaros kede nges, mere karaida aitapoet adiopet, mam idiobore kere, kiton neabonguna ngesi akwapuke.

Kosesen Isirael nekeyangarere kes laiije Misiri, ikar akwataongon. Mere karaida nakapedor adiopet, karaida aanyunet adiopet, mam karaida ibore idiopet yenabu kiswamaun akidingosikec, mam iwadikatai akiro nukolosek nuka Eitaabo. Ngopengol lomojong akaisakanykaongon ka lukanyaongon, alosit okanisa, ainakin imerekek, alimun "Ayogan Maria," arai nuarai ngin kere, kobongori. Okar ngol, eipone ngopengol. Opeganakinis isasedotin kere, "Ekesisianakinan mutan! Ibuni isio aseun ekesisianakinan mutan. Esiomit ngol ejok. Ejeni nuipu nuikamunitos Imisirian." Ibore yenisodit yenijeni ijo, Imisirian ka-ka kes kere, aputosi.

85 Ibore ngipengin nges eswamaikin ekanisa. Ilot oni kere araun Methodist, arai Baptist, arai Presbyterian. "Ido kidum oni ediguri ko Hartford! Kidum oni ediguri ko Wheaton! Kidum oni ediguri kanenice kere, arai Bob Jones! Oni, idum oni ediguri losodit loka ainom ka aicul! Kidum oni D.D., LL.D., arai icebore! Inyobo eswamaun ngin? Abunget naka abanganut.

Arai eipone ngol nges ajaar ko Misiri.

86 Ido mam Edeke abu kiswamanaros kede Isirael kiton neabonguna akwapuke

Kiirarai eong! EBALA EJAKAIT KWANATA, mam Edeke ebuni aiswamanar kede Ekekanisa kiton nebunguna akwapuke, Asiraret naka esawa. Kobongut ageunet! Konyoutu awai kotoma aomisio kus nuka Methodist, Baptist, Presbyterian; Epetekotene kus, Atukusia, luko Oneness, Threeness, ka Fiveness,

nueraas kesi kere; Church of God, Nazarene, Pilgrim Holiness, Church of Christ, ka atukona kere nuesurokinito Kristo! Ido amisiik eong ebe ijangari na akwap. Ibirora kere; eraas kere luajokit. Oo, Ikatunga! Ejaas itunga lueyongitos Edeke toma kanginidiopet kakesi. Ejaas itunga lueyongitos Edeke toma kanginidiopet kotoma atukosia kangun. Konye erionget elopet, kotomake mam erai loka Edeke, ido mam Edeke ebuni aisirereng nges. Mam iswamator cut,

87 Kengisi eong kanginisisian akiro nukolosek (ipote aipup ateepu na) aiwadaikin eong kosodete alimokin eong neabu, ekanisa oraunor erionget, arai mam Edeke obu ojalak ido mam bobo abu iswamanar kanges cut. Kolimok eong neabu Ngesi kitonyouna Lutheran bobo, Wesley ka Methodist, arai bonat Pentekosit. Mam iswamator cut! Abu erionget ngol osalak nen, kosodi amunaar ka aibos! Abu Edeke olem itunga idiopediope kosodi aitam adodiar itunga kau orekec. Ido ngul, idiopediope, okalanyaaka ido kononok, kede ediguri loecepone, kotoni neapotu kosubanatar erionget ece, kosodete aitarauun ngin ikoku yenegeena irwan aarei adepar eipone loajaar.

88 Konye, kanenice, abeit cut, ejaatatr Yawe etunganan loepedori Ngesi aidokokin Akekanin, lomam ebuni acamanar kede ngul...-lueyongito, iriongeta lumam eyongitos Edeke; loebuni anyakar itunga kau nejai atiida, Kristo Yesu, kau kiton Pentekosit nageunet ka Emoyo Lokalaunan lo ageunet, kede aanyuneta nuka ageunet ka nukaumokin nuka ageunet. Ebeit cut ejaatatr Ngesi, kanenice, lomam ebuni abilun kwap nakanginipone kere lokareo, ajalakin, aitanang, alemar, idiobore kere; loebuni asalakin kede ngin.

89 Mam Edeke isirerengi Isirael kiton nebonguna orekec.

Mam Edeke ebuni aisirereng ijo, lo Methodist, Baptist, Presbyterian, Katolik arai Pilgrim Holiness, Nazarene, church of Christ, arai-arai erionget loka Pentekosit. Mam Nges icaki aisirereng ijo koipone kangol. Kobongutu ore, ageunet, kau kiton ojautene lo Pentekosit kwape kobu kiswamaunor kapaaran nako Pentekosit neabu apedor naka Edeke Lokajaran ijulakina ilukumin ngul luka itunga, kosodi ainokokin itaunokec kede akim naka Edeke, abu ngin kitodiar erai nakabeit; mere aanyuneta nuitupusitai, mere icebore yenepwakunit etunganan, mere aceingal, ido alomar toma aruk naka imirio ka idolokina oni kotoma America. "Ingaibo epedori adukun ewema loapolon?" Arai "Ingai epedori ajaun kede atukos naepol kakere?" Inyo atiaketait iswamauni ngin kede Edeke? Ekoto Edeke itunga luemunoko otaoun kec, mam erai atukos napolon. Ido ijai oni kere aruk kane, ikeri. Erai bodo na asiles naitiabo ai, aanyun arai ipedori aiyatakin ecelukumit oriongetewok. Erai asiles. Ekoto Nges oni abongor toma Abeit, abongor Omoyo, abongor aica na abeit, abongor orot loapolon kotoma Kristo, abongor Abeit, ikwaikini

Ngesi ai isirerengi oni kopone kaloilosia? Mam iswamauni cut.

90 Mam Nges abu isirereng Isirael kiton neabongunatar akwap nakaisumunet. Ido ebongutu akwap nakaisumunet, apotu aanyuneta ka nukaumokin kogeutu eswamaunun. Abu kijuka etungana akidingosikec cut, loanyaritai Musa. Inyobo abu Musa lo koyangau, aisia naka ediini naitojokaritai? Ngesi abu kobu kede ediguri losodit loka ainom ka aicul? Ngesi abu kobu kede LL.D., Ph.D.? Abu ngesi kobu kede apedori naka Yawe, ka kede aisiraret, "Abongisi kakwap kana, abongosi ore. Obongosi, Wu luimwangitai, bukus." Amen!

91 Ayapiar ikar ilukumin iarei, ajaas Iyudayan kinga naka akwapukec, isiarakina osodai iwongon luka akwap. Eipone lotikipedoria oni ainakin aisiraret na adaun isabiitin kwana, korai oni aidulokin. Ipedori oni aitup Isirael ageun okau cut kasodete aitodun nesiarakina kes apugan naka Rome, kanuka aingerekec Mesia; eipone loaponi kirengiarere kes toma kanginikwap kere kotoma akwap naka Akuj.

Kobongosi mama ejai Yakob, Isirael, kokau kotoma Ageun 44 ka 45, kasodete aitodun kokau kangina ebe eipone loabu ngesi kisirerengio ikasikou ngul kosodi alimokin kes cut neabuni abwoetaitekec ajaun kotoma apaarasia nukawasia. Ido apedori eong adodiar ijo cut (kanginikwap) naka Isirael, kanginiteker naka Isirael, ebwoi cut kotoma akwapin nealimunitai ebe ebuni ejaun. Ido ijai oni ne lolo.

92 Eyudayat loijeni oni, mam ngol erai Eyudayat obe. Eyudayat obe ngesi ngol loka Orthodox lomam emunauna kede iboro luka akwap, lomam elomarit kinga kosodi alomar okanisan ice. Ngol nges ejai abongor ngina, ojari kede akinyet nakile ka emugati, kokuju naka irongan, komam ecamakinitai kore lomojong. Ajai adukokin kes ere kosiep kalo, kotoma alupok nuamamei elopet, kede acuman nuka ejie edoditos nginiwai. Konye ageu aitolomun akekwi. Amen, ido amen! Eyapie apak.

93 Isimael ngol ka Isaka, ebwoete kanen, epegasi kanuka akwap, konye, kerek, erai ngin naebait Isirael. Arai kiswamaun ebe ilosi ijo Yerusalem nakitetet, mam ecamakinate ijo alomar Yerusalem namojong. Erai ber ijo aige adolore ngina kosodete kesi aiteteminikin ijo kere, Iyarabun, koyangarete do ijo osiep je. Idwe Isimael Ngul. Konye, kidareu, edolunit apak naeponiata idwe luka Edeke akamar nges. Edolit ngin. Eponio aitemun aiduk Yerusalem. Eponio asipokin asuban nuka nginipaaran.

Ido ebuni lokasurup loka Kristo aiswamaun aitutuket ked ekes kanuka ikar ikanykaarei lukawasia. Ido kotoma akidingosike, ebuni aibil aitutuket ngin, abelokin kes toma Otulikane. Ebuni etal anyanyaar ariam

kere, kwangin, kosodi do awasia adolun.

Kosesen, "

94 asabaton akaisakanykaarei." Eebo, ayapia ikar ilukumin iarei ejaas kesi awai; erengear kwana kes, ikecetunga; kwape kajaar kotoma aitinikio nakaetau loka Parao, ajai Nges atinikik etau loka Hitler. Apotu imilionin kakesi kotwakata. Kosesen Eichmann, loikamunitos nuka aiyar Iyudayan imilionin ikanykape. Imilionin ikanykape kakesi, itauon luka itunga, imukerun, idwe, luapolok, kere kaponi koyarai; Eichmann, ediopetunganan. Kosesen Russia, eipone loabu ijo kirengeara kesi kangina. Apotu kirengeasi kesi nginiboisit kere. Araas kesi akwap namwangitai.

Konye naarai kanuka amin isiriginikec, apotu bobo kesi kobongutu. Konye ejaas idis ngul abongonor Palestine. Amen, inacan!

95 Nekianyuna ijo nges egeuni abongori akwapuke!

Ejaatatar kwana kesi kotoma kangina luilosikina adolore ilukumin akwatat akaisaongon ka luongon. Ido inyobo kiswama? Ejenunete kesi Yosep kes. Mam ijo ipodo. Eebo, ipa. Ido ebwoete kesi kere kangina idaritos ngin aismamaun. Ido esawa ngopengol lo...

Etogogongoto akwapin kes kwape akwap, okar loatubor. Edol ngin, iyapia oni osange, adaun Ekanisa Loka Imo. Aso, noinoi ediosawa, epedori Edeke alimun ebe, "Isirael nges Ikatunga." Ejaun ngin, odaunos Imo.

96 "Icakacakaete," abala Yesu, kotoma Matayo 24 "Etal loemudiari, icakacakaete arwatatin nuko Yerusalem kiton nengetakinotor apaarasia nuka Imo." Edaunos ngun, ebongorete do Iyudayan Yerusalem, kanu aitemun aiduk eyekalu ka aima naka oyekalu. Idumuni oni ngun kere kotoma Aisiranareta nuetupanakinete, asabaton akaisakanykaarei nuka alosikineta akanykape.

Kwana abuni eong aisiom eroko egolokina, 'Naarai adaolit ti apak naka oni do alosit ore, kasodete abongun atibong na osawa ediopet.

97 Nasodit, nasodit, arai iwadikai ijo, "aitanang adiakar." Daniel, esula lo 9, ekokoro lo 24. Nasodit, "Atanang adiakar," nakiareit, "Adaun aronis," nakiuniet, "Aituluc numam adolit," naiwongonet "Ayaun adolit namam edaun," naikanyet, "Aipuc atapoet," naikanyetkape, "Ayonyoikin aboisit nakalaunan noi akinyet. Ido ngun kes ibuni oni einer atibong na. Edeke, itodolikin!

98 Kwana, idarek, ber eong enyogok ngun bobo, tetere ijo kianyuni. Nasodit, "aitanang adiakar." Nakiareit, "adaun aronis." Nakiuniet, "aituluc numamadolit." Naiwongonet, "ayaun adolit namam anangi." Naikanyet, "aipuc atapoet ka adwaranut." Naikanyetkape, "anyonyoikin aiboisit nakalaunan noi akinyet."

Eong asiomak ijo ngin kwana, kotom-kotoma Obaibuli. Erai ekokoro lo 24.

Ecorakin asabaton akaisakanykarei otungakon (Iyudayan) korekon loka-korekon lokalaunan (Isirael, Iyudayan, Yerusalem), Aitanang...adiakar (nasodit),...adaun aronis (nakiareit),...aituluc numam adolit (nakiuniet),...ayaun adolit namam edaun (naiwongonet), ka aipuc atapoet (naikanyet)-atapoet ka adwaranut, ka ainyonyoikin aiboisit nakalaunan noi akinyet (naikanyetkape).

Ngun bec kes nuabunit Ngesi alimokin nges, nuabeit aismamao, odoluni do esange.

Kwana, akuar na kianyuni oni nuaraas iboro ngul, kasodete aanyun eipone lokiyapikinitor oni nen. Ido asabiiti naetupakini, ayangaun iboro lu toma ka asipokin cut nekibwoia oni. Amina eong Nges

99 Isirael ebongori akwapukec, Isirael. Alim ber eong na kwana kwape...aomit eong erai kinga naka ateepu. Eong ber alim na. Esawa ngopengol loaraunor Isirael akwap...Apolou na duc eyuunitor eong, koingaren naka akatukot kane, ebe ajai ti icebore yenabeit eong aswam, eroko eong etwana, yenainyakun Isirael mam ejai Ejakait. Naarai osawa kangopekangol, kotoma sainerun naka akwapin nuimorikikina nuka America, ebe aponi Isirael kolimorai kwape akwap, kirwan nasodit kokar ilukumin iarei anyoun naesiarakinere kes, mere itunga; arai osawa ngopengol cut, osawa ngol becebec, nges eriamunotor Emalaika loka Ejakait kede eong kalaije kasodi aijukar eong nejai...kede akiro nukajokak. Ibore ngipengin, olap Loikanyet, 7, 1946.

Kwana, do, icebore yeneinakiniet eong ajenun. Nges "ainyakario naka itauon luka idwe mama ejaas luka papa, ka itauon luka papa mama ejaas idwe," Aisiraret. Koany, Malaki 4 (mere 3), 4!

100 Icebore. Neajaar Billy, okokuka, kede eong, Onac Ern Baxter, orot alosit Palistine, akaulo na isio airiamun kede Iyudayan koreke Onac Arganbright, kosodete aanyun airiamun. Ejukarit Lewi Pethrus Ibaibulin lu ngina. Kosodi nges atemar ebe... Apotu Iyudayan lu kopotu, kobalas "Arai kinyarau ijo abunget naka ingarenok luka Isirael, apeleikinit eong, mere ikesisianakinak lu lutetiak kede kere ikecepucino, konye

konyarau Isiraelin lukabeit luka Isirael nepepe. Ido kisiom isio atutuket na naitetet, ido ijeni isio ebe ebu Mesia, ebuni alimokin isio iboro lu, kwape kaberu nako Samaria. Ijeni isio ebe abala Musa ebe ebuni Mesia kosi eraut enabi. Ido kipedo ijo alimokin kes kosodi aitodikin kes, kede ikokoron," ngun nuibuni oni adolokin kotoma Aisiraret naka lolo, ebe ajai kes aitumudakio ka ikecetaun alemario, tetere etakanuni abaagat naka Imo, ebe ajai ber oni ajaun kede apak naka aitulucio kanuka Imo. Ido aponi ikecetaun kitinikikai kwape cut kajaar apak naka Yosep, kaceda. Kosodi ayangaun Iyudayan ngul kiton aiboisit, kosodi anyaraun ikiliok ngul kosipan kangol, kwape kismama ijo kede Imo lu kane, ka ainyonyoikinio ngin naka Emoyo. Naarai," abalas ebe, "arai erai Yesu lo, arai erai Ngesi Mesia, ido koraas akonikiro abeit, akepolou mam Nges etwanit, ido ejari Ngesi. Ido arai ejari Ngesi, esumunikit Ngesi ajaut toma Obulesin...e bu-... Akejaanakinan-ejaanakinak. Ikesisiakake. Ido arai kiany isio Nges kismamauni aanyunet naka enabi, iyuuni do isio ebe erai Ngesi Mesia."

Etekooro bo lolo ibore yen biai, edolit becebebec. Aso, inyobo do tikismama ngin? Tikeuruunio akwap kotoma apaaran adiopet, akidingos naka ingarenok. Kanginidiopet kakesi tiketema ebe, "ijeni isio ngin." Nelimunia ekesisianakinan ngol ngun, odaun. Tikeuruun akwap kotoma apaaran adiopet. Tikeuruun Isirael kotoma apaaran adiopet.

101 Ido ajai eong orotoka, kasodi abwoun ko Cairo, Misiri, kede atikit kakanika, ido apak naka idakikan itomonakany arai akaisarei luka aiwororo. Ido akapanakinos aiworor. Kasodi eong alosit aanyun apungure naekitoi loirionon, kede itom yen asubunitai kede apungure kangin, abeit eong ajukar ngin nejai opaperoka Emuron loka adekis, Emuron Sam Adair, kanu alangir naka apapula. Ido ajai eong asesen ngin. Kosodi icebore alimokin eong ebe, "Mam ber lo erai esawa. Ikunya awai kama ejai Palestine."

Aso aomit eong, "Arai eong ngol aomomoi ngun." Kasodi eong alosit ngaren.

Ebala icebore ebe, "Mam lo erai esawa."

Kasodi eong alomar kinga kau naka aboisit naitemonokinere idegei. Kasodi eong akeun akakan mama ejai Edeke. Katema ebe, "Edeke, ngol arai Ijo loenerasi kede eong?"

Ebala, "Mam lo erai esawa. Ikunya awai nako Palestine. Mam na erai apak." Kasodi eong alemun atikitika kasodi aijulakin, kasodi alosit anyoun kangina aitor Rome, kasodi abongun Lisbon, kotoma Portugal ido kangina abongun kiton United States.

102 Mam ber esawa edolit. Eroko ber amamus adolit naka Imo ilelebuno, kiton angeset naka eikopo. Konye ecepaaran ebuni, ido ebuni Edeke aijukar icetunganan ngina loerai enabi, ido ebuni atogogongoikin kes. Emuno eong ebe itonyouni Edeke nges katipet, nuerai ngesi kere, ebuni aitonyoun nges katipet. Eyuunit eong ejai abunore. Ngun nges apolou naisisia oni nu, ebe iyapikinit oni.

Ido, kiitu, esawa ngopengol loiijaunatar Iyudayan Kristo, adaun Ekanisa loka Imo. Obukokinete do Imo, ican luipu.

103 Ido-ido eipone ali epedoriatata itunga, isisianakinete ikesisianakinak loapolok, ido kosesenete Ebaibuli lo koipone kalo, kobalas ebe Itori Ekanisa toma apak naka ican luipu, komamei ekokoro Obaibuli loinera ngun! Emameototor ibore idiopet.

104 Abu etunganan alimok eong, pac, ebala ebe, "Oo, abu Inac McPherson isisianak ebe ebuni Ekanisa aitor toma ocan luipu, naarai ebe ibuni oni araut akimiak nuiliacaete kotoma apak kangin." Erai do nen Isirael, mere Imo.

Oekaritos Imo, Ekanisa. Mam kes ebeit aitor ocan luipu. "Abu apiu imu akipi kakitukuke," esula lo 7, "kosodi aitiji atongot," abekot naejotoi. Mere...Oekarite Ekanisa lokabeit. Ejai do ngin opucit loka edukone kanuka kanu, aojau naka apak naelosio epucit loka edukone ngaren, esabiiti lokawasia. Ido nen nges egearor ican luipu, nedakunor emaase ka areo asurokin ikanisan, iboro kaangul.

Kosodi do angeset, kotoma osula lo 19, kobuni do ngesi kede Eteranike. Aleluia! "Ekabaka loka ikabakan, ka Ejakait loka ijaka; anapito naelumonikitai kaokot, ka ajore naka otoma Akuj ibwanenitos asigirian nuka akwangak, eupunos kede Nges. Kanen kobuni do Ngin, ayangar ewaike kanuka apugan naka ikar elukumit. Amen! Oo!

Kisirerengitete Ekiror, oo, kisirerengitete Ekiror,
Kisirerengitete Ekiror loka Ejakait;
Kisirerengitete Ekiror, oo, kisirerengitete Ekiror,
Kisirerengitete Ekiror loka Ejakait.
Yesu Nges Ekiror, Yesu nges Ekiror,
Yesu nges Ekiror loka Ejakait;
Yesu Nges Ekiror, Yesu nges Ekiror,
Yesu nges Ekiror loka Ejakait.
Kitopolo Ekekiror, oo, itopolo Ekekiror,
Oo, itopolo Ekiror loka Ejakait;

Kitopolo Ekiror, oo, itopolo Ekiror,
Itopolo Ekiror loka Ejakait.

105 eipone ali kiswama ijo ngin? Ijo aitarau ngin naepol kotoma aijarakon. Ijo aijar aijar naelimunete kesi ebe, "Ebulesit loka Kristo ngol." Eipone nhol nges itopoloora ijo Ekiror. Aanyutu. Oo, ijo mam imina Nges? [Koyemari atukos ebe, "Amen."-Ekewa.] Oo, ikatunga! Ewokekosio kwana:
Kolosek kotoma atuba, ajeni eong ebe erai cut kwangin,
Aponi kourunai Imukeru kanu alakun itunga kotoma adiakarikec.
Abu Yokana koany Nges kodoket, Imerekek ikar ka ikar,

Imerekek yenapuceta akanyaare, idiopet bon kotoma Akuj ido abu akwap kopedo acamun ngin. Kotoma atu...

Kolosek kotoma atuba, ajeni eong ebe erai cut kwangin,
Aponi kourunai Imukeru kanu alakun itunga kotoma adiakarikec.
Abu Yokana koany Nges kodoket, Imerekek ekar ka ikar,
Oo, kisirerengitete Ekiror loka Ejakait.
Oo, kisirerengitete Ekiror, oo, isirerengitete Ekiror,
Kisirerengitete Ekiror loka Ejakait
Kisirerengitete Ekiror, kisirerengitete Ekiror
Kisirerengitete Ekiror loka Ejakait.

106 Amina eong aima. Dobo ijo? [Kotemari atukos ebe, "Amen."-Ekewa.] Kwana, mam oni ibuni okanisa kanu bon airar asisianakin; naepasi kede ngin. Konye ibuni oni okanisa aima, aima kotoma Omoyo ka Abeit. Kiira ijo Abeit; nges Akiror. Itei jo? Kwana, aima nges atodiar akonikuan mamaKeng. Itei jo?

Oo, amina eong Etunganan ngol loelomunit koGalilaya, koGalilaya,
Naarai eswamaiki eong nuipu.
Etim Ngesi akaronis kere, ebwaiki Emoyo Lokalaunan toma;
Oo, amina eong, amina eong etunganan ngol loGalilaya.
Abu eketeleman esolo kolot ailip koyekalu ngina apaaran adiopet,
Abu komony, "Wu Ejakait, kitimoi eong!"
Kaponi itimoi nges kanginidiakar, kosodete aibwaikin ainapakin naidul toma.
Abu kotema, "Kopotu, koanyutu Etunganan lo loebunit koGalilaya."
Oo, amina eong Etunganan ngol loelomunit koGalilaya, koGalilaya,
Naarai eswamaiki eong nuipu.
Etim Ngesi akaronis kere, ebwaiki Emoyo Lokalaunan toma.
Oo, amina eong, amina eong Etunganan ngol loGalilaya.
Aponi kitonyounai ingwalasik, ibubui aponi koinakinai einer.
Apedor ngin aponi kinerakinai angolol kede amin.
Imudukiok aponi kitikwenyununai, ajeni eong ebe apedori bon araun
Apedor naka Etunganan kangol loelomunit koGalilaya.
Oo, amina eong Etunganan ngol loelomunit koGalilaya, koGalilaya,
Naarai eswamaiki eong nuipu.
Etim akaronis kere, ebwaiki Emoyo Lokalaunan toma.
Oo, amina eong, amina eong Etunganan ngol loelomunit koGalilaya

Kopupok na.

Aberu katan, abu Ngesi kolim adiaakanareta kere nukeswamat,
Eipone lojaatatar ngesi ikiliok ikany apak kangin.

(Ngesi Ngol.)

Aponi itimoi nges kanginironis kere, kosodi ainapakin naidul alomun toma;
Kosodi kiworo, "Kopotu, koanyutu Etunganan ngol loGalilaya!
Oo, amina eong Etunganan ngol loelomunit koGalilaya, koGalilaya,
Naarai eswamaiki eong nuipu.
Etim akaronis kere, ebwaiki Emoyo Lokalaunan toma.

Amina eong Nges. Yesi mam? [Kotemari atukos ebe, "Amen."-Ekewa.]

107 Ka ekatau kere! Yesi mam? ["Amen."] Mam kereka Nges eumokina? ["Amen."]
Oo, eumokina, eumokina, Yesu mamaka, (Erai bo Ngesi inyo?)
Ekasinapikinan, lokapolon loka ainapakin, erai Ngesi Edeke Lokapedor;
Oo, alakun eong, aidar eong kama ejai aronis kere ka ileic,
Eumokina Ekalakunanika, ituritete Ekekiror!

Etuluroto kwana awokokwes kasodete aoomoon ngin.

Aoliorit eong, konye kwana abongu eong, alacakina eong kama ejai etube kere,
(Ejaas akwapin abilibilun; mamace ngun.)

Einakini Yesu alacakinio ka aitajario naileleba;
 Itajarit Ngesi eong, idarit eong kama ejai adiakar kere ka ileic,
 Eumokina Ekalakunanika, ituritete Ekekiror.
 Oo, eumokina, eumokina, Yesu mamaka,
 Ekesinapikinan, Ekapolon loka Ainapakin, erai Ngesi Edeke Lokapedor;
 Alakun eong, aidar eong kama ejai aronis kere ka ileic,
 Eumokina Ekalakunanika, ituritete Ekekiror!

Oo, koomoom ngin!

Aoliorit eong, kwana abong eong, alacakina kama ejai etube,
 Einakini Yesu alacakinio ka aitajario naileleba;
 Aitajar eong, (inyobo iswamai Ngesi?) aidar eong kama ejai aronis kere ka ileic,
 (Aitorit kujuke)
 Oo, eumokina Ekalakunanika, ituritete Ekekiror.

Kwana nepepe!

Oo, eumokina, eumokina, Yesu mamaka,
 Ekesinapikinan, Ekapolon loka Ainapakin, erai Ngesi Edeke Lokapedor;
 Kanukinyo, aitajar eong, aidar eong kama ejai aronis kere ka ileic,
 Eumokina Ekalakunanika, ituritete Ekekiror.
 Oo, eipone loaminar eong Yesu, (aibuses)
 Oo, eipone loaminar eong...
 Eyalama eong noi etajari eong! Eyalama eong noi edarit eong Akebunore!
 Oo, amina Yesu,
 Naarai abu Ngesi ageu amin eong.

Kwana ekeetos awokokanin kuju, arai kipeleikinit oni.

Mam cut eong ajali Nges,
 Mam cut eong ajali Nges,
 Mam cut eong ajali Nges,
 Naarai abu Ngesi ageu amin eong.

108 Ijo imina Nges? [Kotemari ayukos ebe "Eebo."-Ekewa.] Ejai bodo yes aminanar bonik ka bonik. Naarai, arai mam ijo imina ngul luiseseni ijo kane, eipone boa li iminuna ijo Nges lomam ijo kianyunitor? Aso eyogaanakinis idiopet ka yenice, kotema:

Oo, eipone loaminar eong Yesu,
 Oo, eipone loaminar eong Yesu,
 Oo, eipone loaminar eong Yesu,
 Naarai abu Ngesi ageu amin eong.
 Mam cut...(Ikeikisi Ngesi akusikanin kwana. Nges nen.)...-jal Nges,
 Mam cut eong ajali Nges,
 Mam cut eong ajali Nges,
 Mam cut eong ajali Nges,
 Naarai abu Ngesi ageu amin eong.

109 koomoom ber ijo, abu Ngesi kitijenik oni apukokinio naapolon. Oni mam imina Nges? [Kotemari atukos ebe, "Amen."-Ekewa.] Ngesi mam eumokina? ["Amen."] Eipone loepolor oni aiyalamar kanuka Ejakaitiwok Yesu; mam ejali oni. "Ajai kede yesi apaarasia kere, kiton ..." Yesi inumunumete asabaton akaisakanykaarei nuka Daniel? ["Amen."] Oo, oni mam imina Nges? Iswamai biai?

Eseseni akaiyuun mamaKon,
 Ijo Imerekek yen koCalvary,
 Eketajaran...

Oma Nges, otaukon.

Kwana kiirarai eong kwape kelipia,
 Olema akadiakanareta kere awai
 Araun eong agear lolo

Lokon kere!

Kwape ketoritor aditot naemutono naka aijar, (oni kere itorit)
 Ido enyanyaara aiturur alukun eong, (Eebo, Ejakait.)

Oraun do Ijo engarenonika; (Aingarenikin eong aitor nen Ejakait.)

Wu isibelok amuton oraun apaaran,

Opia akuriau naka aiturur awai,

Karaida ajalakin eong aoliori

Awai kama ijai Ijo.

Ogeuni onac Branham awoere Eseseni Akaiyuun Kuju MamaKon-Ekewa.]

Agogong mama ejai etauka loiloro,
Isinyikok akagogong;
Isibelok amuton oraun apaaran,
Opia akakuriau kere awai,
Araun eong agear lolo
Lokon kere!

110 Wu Yesu, iseseni isio ebe iyapikinit isio icebore. Enerit enabi Isaia nukeng; enerit Yeremia nukeng. Abu Daniel kiteluo kau kosodi aanyun nueneritos kesi. Abu idupo eketau igurun, kosodi ngesi-ngesi aiteluor ekereet toma Akuj. Kolung, epuko ka ekurwon. Akoto ngesi apupun, tetere nges ikwenyari itunga.

Ejakait, iseseni isio da kanuka Iitabon, Ekonitaabo, Eitaabo loka Isaia, Yokana, Luka, Marako, Matayo, Eitaabo loka Apukokinio, kere Ikonitaabon, ebe iyapia isio angeset. Ido ibelok isio ikosireetin toma akuj, kotoma ailip, aingainga, ajenun neijaria isio, Ejakait. Igeu isio aanyun aica nakapaaran engiuni. Ido, Ejakait, ibunit isio mama ijai Ijo. Eseseni akosiyuun Ijo kwana. Alacar nginilangir, nginironis, nginimamus aiyuun naetapit aigogoloonor isio, ibwapit nejai ainakinet naka anyarit nakokuju, ajenete ebe edit akosipak.

111 Kisirereng itunga lu kotoma kane, Ejakait. Eminas Ijo. Eraas lukon. Elomutu kesi kinga. Ijo nges ijai aswam naka apukor. Ilipi isio ebe iinakini Ijo isio iboro lu kwape kidaritor Ijo.

Koinakinai isio atibong najokan naka aisisia, Ejakait. Koinakinai isio amisiikin. Inyakunai isio bobo atiibong na, etetiak. Ejakait, kinyonyoikinai eong atibong na, oo, kwape kesisia, Ejakait, kanuka alosikineta akanykape nuka apejo naka Gabriel. Arai abu Gabriel kobu kosodi ainakin kosodi alosikineta akanykape, Ejakait, ekoto isio ajenun ngun. Isisiai isio kanuka Itaabon ido ijeni ebe iyapia isio. Aso ilipi isio ebe ibuni Ijo apukor ngin atibong na.

Nasabiiti naetupakini, Ejakait, Wu Edeke, osipok apaarasia ngun toma nen. Mam eong ajeni eipone loebeitor, konye ipedori Ijo ayangaun isio cut kiton apak. Koinakinai ngin, Papa. Iseseni isio Ijo. Iminanara isio bonik ka bonik ido apotu aokot nuka Yesu Kristo, Okoku loka Edeke italautu isio kama ejai adiakar kere. Iseseni isio Ijo kwana. Ingarakinai isio kwape kidareunitor Ijo, Papa, kanuka Yesu Ejakaitikosi.



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7